








Library  
of the  
University of Toronto



107

See Opere XVI, 341

CF 144



Digitized by the Internet Archive  
in 2024 with funding from  
University of Toronto

<https://archive.org/details/ioanbaptmorinire00mori>









IOAN. BAPT. MORINI,<sup>3</sup>

DOCTORIS MEDICI, ET

PARISIIS REGII MATHEMATVM

Proffloris, Responſio pro Telluris quiete.

AD

IACOBI LANSBERGII DOCTORIS MEDICE

Apologiam pro Telluris motu.

AD EMINENTISSIMVM

CARDINALEM RICHELIVM,

DVCEM, ET FRANCIE PAREM.

*Terra ſtat in æternum; Sol oritur & occidit. Eccleſiaſt. cap. i.*



PARISIIS,

Sumptibus Authoris, apud quem venales ſunt;

Tum apud IOANNEM LIBERT, viâ D. Ioannis Lateranenſis,  
è regione Auditorij Regij.

CVM PRIVILEGIO REGIS.

---

M. DC. XXXIV.









EMINENTISSIMO  
CARDINALI RICHELIO;  
DVCI, ET FRANCIAE PARI.

**V**LGGO fertur, (CARDINALIS EMINENTISSIME) In magnis rebus sat esse voluisse. Sed cum velle liceat unicuique, aggredi paucis, perficere verò paucissimis: Me tamen ex horum numero fore spero, in re maxima à me suscepta; quippe solutione famosi Problematis de Telluris motu vel quiete. Omis- sis enim ijs quæ in mea causæ gratiam, acta sunt Romæ aduersus Galileum, si hæc responsio ad Apologiam Iacobi Lansbergij perpendatur; non dubito quin cum illo utcumque pernicipi omnes fateri cogantur, iam actum esse de Telluris motu. Meque non solum pridem sub tuis felicissimis auspicijs tantam victoriam reportasse, contra celebriores huius seculi priorumque viros; sed nunc etiam sub iisdem omnino confirmasse. Nouum ergo laborem hunc, Tuo Nomini quoque nuncupatum



grato (precor) animo excipiat T. E. ut qua mihi Te  
fautore clementissimo peragenda supersunt, & ala-  
crius suscipiantur, & tanto Numine propitio feliciter  
absoluantur. Vale. Parisijs die 24. Iunij, Anno Do-  
mini 1634.

TVÆ EMINENTIÆ

Addictissimus & obsequentissimus  
IOAN. BAPT. MORINVS.





IOAN. BAPTISTÆ MORINI,

DOCTORIS MEDICI, ET PARISIIS

REGII MATHEMATVM PROFESSORIS,

Responsio pro Telluris quiete.

AD

IACOBI LANSBERGII DOCTORIS

Medici Apologiam pro Telluris motu.

---

CAPVT I.

*In quo de Apologia Lansbergij censura generalis exponitur.*



ANDEM prodiit in lucem Apologia à Copernicanis tandiu optata, Iacobi Lansbergij Medicinæ Doctõris, pro commentationibus Philippi Lansbergij Patris in motum Terræ diurnum & annuum; Aduersus Libertum Fromundum Theologum Louaniensem, & me: In quâ quidem agnoscere licet vtrumque Lansbergium Patrem & Filium, sed nullum Spiritus sancti vestigiũ: Spiritus quippe pacis, charitatis, modestiæ, benignitatis, scientiæ, veritatis; Spiritus enim planè contrarius singulas libri paginas occupat, adeo vt à nostris etiam Copernicanis circa suam expectationem maxime delusis, indignus responsione censeatur. Ac ego quidem libenter abstinuissem; tum quia tempore mihi pretioso ad alia indigeo: tum quia conuictis certare loco rationum cum viro ad hoc nato

meus abhorret animus. Tandem verò respondere consensi, his conuictus rationibus. Prima quòd excusandus mihi videretur Iacobus Lansbergius, qui erga defunctum parentem falsa pietate motus, se Manibus eius egregiè satisfacturum arbitratus est, si quæcunque ille senex viuens tradidit tanquam oracula vel Prophetæ verba mordicus defenderet; omnium verò aduersariorum & scripta & famam illis sacrificaret. Secunda quòd seculum hoc nimium scateat vilibus ingeniis quæ conuitiis delectantur, nec veritatem contumeliis affectam pro veritate habeant; sed ei quoque tanquam figmento illudant. Tertia verò vt quid solutio nostra famosi illius problematis hactenus operata sit, quàmque iam inops & misera sit Copernicanorum causa, euidentius innotescat.

Porro vt in prioribus Copernicanorum libris præcipua tantum selegi Telluris motus fundamenta euertenda: Ita & idem facturus sunt in Apologia Iacobi Lansbergij. Et Fromondo viro doctissimo quæ sua sunt defendenda relinquo; meorum enim tantum satago. Ac propterea responsionem hanc 6 dumtaxat capitibus complectar, quorum titulis ipsius responsionis methodus patet. Hoc verò caput à me præmittitur vt quia singulos Apologiæ tractatus & capita tractatum non discutio, saltem quid toto libro contineatur, quidque de illo censendum sit, summatim neminem lateat.

Primùm ergo in Epistolâ dedicatoria conqueritur Lansbergius, quòd sui patris commentationes pro Telluris motu oppugnarim, quasi facinus illud nimium audax videatur. Sed falleris plurimum Iacobe Lansbergi, si putes me tui præsertim Patris causâ scripsisse. Alios certè illustriores andagonistas mihi proposueram; Nempe magnùm Copernicum, doctissimum Kepplerum & famosum Galilæum, cuius præcipua ratio erat fluxus & refluxus Oceani, causatus à Telluris motu in Ecliptica, ab ipso excogitata. Similiterque Kepplerus & Copernicus ad stabiliendum Terræ motum subriles rationes inuenère: At Ph. Lansbergius tantum illorum rationes sibi arrogat, nihilque ex seipso protulit, nisi fortè absurdam demonstrationem scientificam motus Telluris in Ecliptica, de qua iam acturi sumus.

Siquidem in eadem epistola circa doctrinam de Telluris motu hæc habentur. *Solus fere Philippus Lansbergius certa ac solida sectatus*



*doctrinam hanc non minus conspicuam quàm certam reddidit; quia non probabiliter solum, sed scientificè demonstravit Terram in Ecliptica moueri.*

Et pag. 122. Apologia hæc scripta sunt. D. Lansbergius comment. parte 2. pag. 43. probauit per Terræ motum in Ecliptica duas stationes à se inuentas fuisse ad totum Cælum mensurandum opportunas & Astronomis hæctenus incognitas. Vt verò hoc ex suo fonte deducatur, sciendum quod postquam ipsa pag. 43. Philippus Lansbergius gloriatus est, se per duas stationes vnâ in Terræ centro, alterâ in superficieprehendisse Lunæ nouæ ac plenæ maximam remotionem esse  $64\frac{1}{2}$  semidiametrorum Terræ; quantam etiam ante se inuenêre Hipparchus & Ptolemæus; indeque distantiam Solis maximam & ipsorum Solis & Lunæ semidiametros: subnectit deinde quo pacto pro dimetiendis; minoribus planetis, secunda statio extra Terram quærenda sit; quodd vnica tantum statio in Terra sumi possit, ob eandem semper visionem ex centro & superficie, his omninò verbis.

*Sed qua tandem ratione dimensor alio Cæli loco secundam stationem acquireret? Certè neque Hipparchus, neque Ptolemæus nec ullus veterum, modum acquirendi alteram stationem sciûere; ideoque de mensurandis alijs planetis nullam fecere mentionem: sed DEVS ille O. M. qui multa nobis extremo seculo reuelauit veteribus incognita: inter alia quoque manifestauit modum dimetiendi & reliquos planetas per spheram motusque Terræ. Nam Terra in sua sphaera quotidie promota, locum mutat in Cælo; ut mensori ad libitum duas stationes assumere liceat, quibus acquirat distantias planetarum.*

Cæterum scientificam illam demonstrationem motus Telluris in Ecliptica, quam tota sua Apologiâ Lansbergius contra omnes huiusce temporis Astronomos adeo pertinaciter ruetur & summis laudibus effert nouo examini subijciemus cap. 3. Nunc verò dic quæso Iacobe Lansbergi, si posthac quispiam de scientifica demonstratione motus Telluris in Ecliptica, vt de re sibi primò cognita sese scripto publico iactaret, deque duabus stationibus in Ecliptica sibi à DEO reuelatis: nonne illum intolerabilis vanitatis & furci coram Astronomis omnibus impudentissimi argueres? Atqui ante tuum patrem Aristarchus, Copernicus & Kepplerus, saltem æquè scientificè ac tuus pater, Telluris motum in Eclipti-

câ demonstrarunt; vt constat eorum libris, quos vidit Ph. Lansbergius quique nihil aliud sonant: Et de stationibus in Eclipticâ ad minores planetas mensurandos etiam gloriantur, vt passim videre est in Epitome astron. Copernic. Keppleri; præsertim verbis expressis *lib. 4. pag. 549.* Ergo conclude tu ipse nec sine pudore. Quod autem dicis suprà, Ph. Lansbergium probasse per Terræ motum in Eclipticâ duas stationes à se inuentas fuisse, non aduertis quid dicas, vel id ignoras: quia stationes ipsæ non demonstrantur, sed assumuntur ad libitum; vt patet ex tui patris textu qui insuper gloriatur eas sibi fuisse reuelatas; sed audiamus quo fine sequitur ergo in textu. Ph. Lansbergij.

*Attamen cum DEVS & natura nihil agant frustra, quæret fortè aliquis cur rem tanti momenti nobis reuelauerit. Respondeo DEVM voluisse docere non Terram tantum, sed & Cælum nostri causâ creatam. O doctrinam cæteris hæcenus seculis absconditam! sed fieri ne potest vt Philippus Lansbergius senuerit minister Goæse septuagenarius, ignarus aliunde Cælum & Terram nostri causâ esse creata, atque ad hoc tali reuelatione indiguerit? Sed pergamus. Quandoquidem verò Ph. Lansbergius loco citato duas stationes vult pro minoribus planetis, vnâ in Terra, secundam extra Terram; dic pro illo quomodo sumpserit stationem extra Terram? Anne relicâ Terrâ procul volauit ad aliud Eclipticæ punctum? dic etiam an descenderit ad Terræ centrum pro Lunæ distantîâ mensurandâ: Videte quæso num hi Astronomi ignaris & rudioribus illudere susceperint. Nam siue Terra moueatur siue quiescat, & Copernicani & Tychonici vnica stationem corpoream habere queunt in superficie Terræ; altera verò tantum mentaliter sumitur ab omnibus ex Telluris siue Mundi centro pro distantîis & semidiаметris Solis & Lunæ circa Tellurem ordinatorum: vel ex centro Solis pro distantîis quinque minorum planetarum circa Solem ipsum ordinatorum; quorum semidiâmetri apparentes in eorum mediâ distantîâ sumuntur, dum propriis motibus in suo excentrico ad hominem in Terræ superficie quiescentem & obseruantem accedunt, vt diximus *pag. 29. nostræ solutionis*: Cur ergo Ph. Lansbergius se iactat de duabus sibi reuelatis stationibus in Ecliptica, vnâ in Terrâ, alterâ extra? Adde quod in hoc etiam sibi contradicit dū superius dixit. *Nam Terra in suâ spherâ quotidie promota, &c.**



Cogor similem aliam illusionem detegere, quæ est vna è præcipuis columnis Terram in Eclipticâ sustentantibus; & habetur *cap. 1. Apologia pag. 2. ex Controuersia 1. Ph. Lansbergij*; nimirum. *Per Telluris quietem violari & prorsus inuerti Dei ordinem, quo voluit vt stella quæ minoribus sphaeris continentur minori, quæ autem maioribus, maiori tempore sui motus circumuolutiones absoluant.* Sed ostendo falsissimum esse ordinem illum peruerti posita Telluris quiete. Nam eo pacto tria erunt in Mundo systemata nobis cognita, scilicet duo particularia Solis & Iouis, & alterum totale quod est Terræ. Iam verò ex Mercurio, Venere, Marte, Ioue & Saturno circa Solem ordinatis, Mercurius minorem orbitam sortitus est; ideoque celerius circumuoluitur, tum Venus, Mars, Iupiter & Saturnus. Ex 4 astris Medicæis circa Iouem ordinatis, Ioui propinquius etiam breuiori tempore circumfertur quàm remotius. Denique ex Luna, Sole & sphaera fixarum circa Terram ordinatis, Lunæ sphaera minor est, ideoque mouetur velocius quàm Sol, & hic velocius quàm fixæ quarum sphaera stupendæ vastitatis extat, ideoque tardissimè motu proprio gyrum absoluit. Hæc autem omnia (vt ouum sua testa) continet atque ambit primum mobile toti machinæ spatio 24 horarum circumferendæ destinatum, quòd hæc diurna astrorum latitudo Telluri quiescenti sit omnino necessaria: sed cùm Cælum illud stellis careat, eius nec motui nec velocitati officit ratio Copernicanorum. Nonne igitur hîc euidentissimè falsum ostenditur, quod à Copernicanis asseritur?

Sed adhuc alia non minùs absurda superest illusio Copernicanorum & Iacobi Lansbergij *pag. apol. 80.* quam alteram columnam faciunt motus Terræ; Quippe nos ad Telluris quietem asserendam cogi multa supponere: 1. Cælum ab ortu in occasum duci. 2. planetas præter motum sibi proprium, duos insuper habere motus; vnum cum octaua sphaera diurnum, alterum cum Sole annuum. 3. Dari inuisibilem sphaeram supra sphaeram fixarum. 4. sphaeram omniam maximam, circumuolutionem breuissimam absoluerè. 5. huius sphaera motum adeo celerem esse, vt aliarum sphaerarum motus ad eum comparati tardi sint ac quasi nulli. 6. Lunam circulum periodicè peragrarè diebus 27; & duobus insuper diebus percurrere in suo proprio circulo 29 gradus. 7. Eclipticam planetarum deferentem suis epicyclis decuplo, quintuplo & sesquiplò minorem esse. 8. Saturnum longissimè à Sole situm, Solis motum comitari: Lunam contra

*ipsi deferenti hoc est Eclipticæ inclusam & Soli vicinam quiescere, nec Solis motum sequi. 9. Naturam 13 motibus in Cælo moliri, quod diurno & annuo Terræ motu potest: Hæcne Tibi tuoque Patri sufficiunt, Lansbergi? Dic plura. Ex his verò sextum à te malè refertur; octauum autem & nouum falsò Tychonicis imponuntur. De cæteris verò miror quomodo nec tu nec tuus Pater nec vllus Copernicanorum aduerterit vel aduertere voluerit Tychonicos duo tantum principia supponere. Primum astronomicum, quippe Terram in Mundi centro quiescere. Secundum physicum, nempe vni corpori vnum per se motum competere. Ex quibus reliqua omnia superius verè relata deducuntur. Nonne nobis liceret à simili asserere totidem à vobis supponi? sed quia etiam consequi deprehenduntur ex Solis situ in Mundi centro, & Telluris motu in Ecliptica, quid frustra tempus teremus, & ignaros vt facitis seducemus? vides hîc candorem meum & solius veritatis amorem, qui si etiam insit Copernicanis, nescio quâ cæcitate horum ingenia detineantur, quominus suarum rationum tam euidentem futilitatem intueri nequeant.*

Porro notanda venit Iacobi Lansbergij insignis peruicacia toto suæ Apologiæ decursu, qui in Patris scripta adèd strictè iurauit, vt ne latum quidem vnguem ab vlla eius opinione Physica, Astronomica & Theologica vteunque falsa possit vllius viri docti ratione diuoueri: quinimo contra rationes validas illi deficiente ratione, ad conuitiâ, scommata & contempus adeo sæpe recurrit, vt hisce tota eius Apologia fœteat.

Hæc verò me nequaquam mouent; non enim vanæ famæ comparandæ, sed veritati addiscendæ atque tuendæ solùm incumbo: Mouet autem maximè quod nequidem Tycho vir nobilissimus totoque Terrarum orbe celeberrimus Astronomiæ instaurator, ab atrocibus calumniis liberetur; sed turpiter ab ipso Lansbergio tractetur siquidem Lansbergius in Apolog. pag. 87. circa rationes pro Telluris motu vel quiete sic Bartholinum alloquitur. *Desine igitur, Bartholine, Lansbergij ineptiam mirari, sed crassi ingenij tui stuporem hîc potius agnosce atque imprimis Tychonis tui insignem vanitatem. qui licet in alijs vt Astronomus se gesserit, hic tamen poetico ausu quoduis finxit; certa atque incerta assumens, verisimilia absurda, vera & falsa præsupponens, modò cum suis conceptibus consentirent. Ex*



quibus modestiæ speciminibus ingenuos & cordatos viros decet conicere, quo spiritu illi agantur, qui omnibus antiquis & Neotericis Astronomis, Philosophis & Theologis perperam conantur anteponere vnicum Ph. Lansbergium, qui Copernici, Tychonis, Longomontani, Keppleri, & aliorum inuenta tanquam sibi propria arrogavit. Sed hæc à pace charitate & modestia penitus aliena, vilibus ingeniis relinquuntur, & deinceps ad rem propositam seriò accingamur.

Si Lansbergio veritatis cura fuisset, in capitibus 4. 5. & 6. mei libri pedem fixisset, vbi meæ solutionis iacta sunt duo insignia fundamenta ante me à nullo exposita. Primum *cap. 4.* sacras litteras longè certiùs eidentiusque Telluris quietem quàm motum asseuerare, (quod etiam fatetur Ph. Lansbergius, *Comm. p. 11.*) proteruis tamen conuincendis minimè sufficere. Secundum *cap. 5.* Rationibus astronomicis hætenus demonstrari non potuisse, an Tellus quiescat vel moueatur; & demonstro *cap. 6.* cur illud demonstrari nequeat. Contra quæ fundamenta nequidem verbum ausus est effari Iacobus Lansbergius; quinimò ipse *pag. 5. suæ Apologiae*, meam demonstrationem capituli 6. approbat. Cur ergo tantum temporis perdis inutiliter, tibi scribendo & aliis legendo quæ contra Fromondum & Bartholinum circa scripturarum explicationem & cœlestes apparentias ex Telluris motu sequentes accumulasti? Eo nimirum solo fine, vt omnium etiam minimorum tui patris dictorum egregius defensor habereris: & tua Apologia in 6. tractatus proëmiis pluribusque capitibus distinctos excresceret; alioquin enim nimium tenuis in lucem prodire coacta fuisset: Certè quandoquidem *pag. 106. tuæ Apologiae* fateris me veterum argumentis minimè fidere, quæ etiam supradictis capitulis 4. 5. & 6. omnino respuo, longè meliùs, breuiùsque Fromondo & Bartholino satisfecisses 20 tantum lineis ex meis capitibus 4. 5. & 6. quàm tota tua Apologiâ feceris, nisi vidisses capita illa tuo calculo ad amissim non quadrare; ob tui Patris demonstrationem scientificam toties decantatam quæ ibidem scientificè conuellitur. Hoc autem pacto tibi tantum superfuissent oppugnandæ ratiunculæ (vt ais) à me excogitatæ, quod quàm strenuè feceris, patebit inferiùs.

Porro Iacobus Lansbergius librum meum refutaturus non so-

lum vitauit capita supradicta 4. 5. & 6. tanquam scopulos scopo suo periculosos: Sed Copernicanorum argumenta à me soluta de interfectione orbitarum Solis & Martis, de Epicyclis Eclipticâ deferente maioribus: de axe motus diurni; de motuum compendio per Telluris motum: de systemate Solis circumgestantis 5. planetas; de Telluris motrice vi ab anima vel specie solari: de eiusdem Telluris virtute tractrice grauium; De fluxu & refluxu Maris, & alia præcipua à me selecta quibus ipsi Tellurem circumuolui opinantur; & circa quæ nostri Copernicani quid egregium à Lansbergio expectabant; ipse ne quidem verbulo ausus est defendere, sed tantum aliqua à suo patre adducta, nec adhuc omnia. Rationes autem meas quas sibi proposuit refellendas, aut falsificat, aut truncat, aut sine ratione simpliciter negat; non secus ac multa sine ratione simpliciter asserit; vultque sibi credi ut alteri Pythagoræ, vel ut Caluino credit, quem toties pro suo nobis obtrudit, quasi eius autoritate nos vellet obruere; dum interim Pontificum & Cardinalium nostrorum ridet autoritatem. Sed vtinam scaperes & intelligeres (mi Lansbergi) & nouissima prouideres: Etenim cerneres quot sectæ atque hæreses in Ecclesiam Catholicam à CHRISTI tempore insurrexerint, quæ omnes ab ipsa Ecclesia condemnatæ perierunt cum suis autoribus atque sectatoribus; ipsa Ecclesiâ Catholica stante vsque ad consummationem seculi iuxta CHRISTI promissum: indeque prudenter conijceres, idem tandem futurum de sectis Lutheri & Caluini nouissimorum; qui cum essent vnius eiusdemque nobiscum fidei, imò viri Ecclesiastici, sese ab Ecclesiæ veræ trunco, deindeque ab inuicem separarunt vosque miserè seduxerunt; Et in Terra atque Mari motum turbulentissimum excitarunt, qui adhuc hodie cum vestrum & nostrum cruenta & deploranda strage perseuerat. Quæ certè ratio homini utcunque prudenti, & diuinum lumen minimè respuenti, ad perfectam resipiscenciam sufficeret; Tibique pro tua & tuorum salute obiter exposita, charitate non ficta; vtinam profit.

Tandem hoc non viderur omittendum quod etsi Lansbergius in singulis suæ Apologiæ tractatibus imò capitibus nihil efficiat: quod pro suâ causa valeat, tamen passim suas sententias concludit verbis Mathematicis, *quod erat demonstrandum*; & cum maximo



Fromondi meique contemptu valde gloriosum sibi canit triumphum : sed fallitur si inde sibi soli risum commouisse putauerit.

Subductis igitur rationibus de vniuersâ Lansbergij Apologia censeo, melius illi fuisse si hæc in lucem non prodisset : non enim cogerer eius pertinacem ignorantiam circa Ph. Lansbergij scientificam demonstrationem pro Telluris motu in Eclyptica (quâ solâ innititur) luce meridiana euidentiore facere : eius erga Tychonem inuidia & animus ad conuitia & calumnias pronus non innotuissent : nec à suscepta Telluris motus defensione posthac inuitus desistere cogeretur.

## CAPVT II.

*In quo examinantur responsiones Lansbergij, ad meas solutiones argumentorum, à Copernicanis propositorum : maxime verò scientifica demonstrationis Ph. Lansbergij.*

**E**X plurimis Copernicanorum argumentis à me solutis quinque tantum defendenda selegit Lansbergius, quasi imbecillius suo quidem iudicio soluta : pro reliquis verò, etsi præcipuis Copernicanorum fundamentis, nihil omnino ausus est respondere. Quàm autem verè ac ingenuè responsiones meas retulerit, doctèque refellerit expendamus.

Primum ergo cum ad argumentum Copernicanorum desumptum à compendio motuum & apparentiâ phænomenon, respondissem pag. 37. meæ solutionis. In Mundi fabrica & globorum situ atque motu, non solam fuisse Dei intentionem homini representare apparentias motuum : sed primariam eius intentionem fuisse, innumeram specie & indiuiduis generationem in globo terrestri, cuius idcirco situs in vtero siue centro Cæli generatorum omnium parentis erat omnino necessarius. Lansbergius in sua Apologia pag. 4. totum textum meum falsificat : vbi enim inuenies, Lansbergi, hanc sententiam à me scriptam ? *Primò utilis & necessaria homini futura erat multarum rerum generatio in Terrâ ? Vbi*

hanc alteram; *quæ omnia fieri non potuissent nisi DEVS hominem in quiescenti Terra collocasset?* quasi DEI omnipotentia limites etiam in rebus naturalibus fuerim ausus præscribere? Ideo autem & hic & in sequentibus falsificas, vt tibi respondendi viam aliquam aperias; est enim alia vis meis verbis, quàm tuis falsò additis aut suppositis. Videamus autem quid respondeas. Dicis ergo, *multarum rerum generationem in Terra contingere posse siue Terra, siue Cælum moueatur, quia Cæli & Solis influentiæ quæ per diurnum motum distribuuntur, eodem modo Terram attingunt siue hoc, siue illud fiat.* Sed quàm falsa sit tua responsio probatur ex ipso met Kepplero lib. 4. *Astr. Copern. pag. 448. vbi ait quod Sol æquabilius & rectius totum Mundum sphericum illuminat in centro, quàm circa illud circumeundo in Ecliptica.* Nam à contrario sequitur quod Tellus in ipso centro æquabilius & rectius afficietur quàm extra, ideoque non eodem modo, siue hoc siue illud sit, vt asseris. Vide infra cap. 3. defensiones meorum argumentorum astrologicorum, vbi agitur de influentijs. Præterea generationes elementales non tantum causantur à planetis & sphaerâ fixarum; sed præcipuè causantur à primâ causâ Phisica, seu virtute primi Cæli in dodecatemoria distributi, vt conuincunt inexpugnabiles rationes & experientiæ astrologicæ, de quibus fusiùs infra; quod tamen Cælum à Copernicanis & tuo præsertim Patre pag. 102. *progym.* & à Te ipso pag. 6. & 7. *Apol.* negatur & expeditur. Patet ergo Te de influentijs cœlestibus respondentem eas ignorasse, ac modum agendi corporum cœlestium, vt constabit euidentius sequenti capite.

Quod verò ais *navium motum & leuium grauiumque ascensum & descensum se habere eodem modo siue Terra moueatur siue quiescat; neque id eò loci demonstraſti, neque alibi demonstraſtis vt patebit in sequentibus.*

Denique ad 4. argumenti membrum, contra quod ais *fieri non posse vt ex diurno Terræ vel Cæli motu, contemplatio Cæli & Cælestium motuum, homini vel commodior vel incommodior reddatur:* debebas igitur diluere rationes à me circa hoc allatas contra Kepplerum pag. 29. & 30. solutionis meæ, quibus tantum ostendebam falsum esse quod aiebat Kepplerus; hominem melius in Eclipticâ locari ad dimensionem & contemplationem siderum, quàm in Mundi centro: quas rationes intactas proindeque in suo valore



subsistentes reliquisti: Nec tibi prodest Aristoteles 2. de Cælo cap. 8. minúsque mea demonstratio cap. 7. Nam hæc equidem valent pro identitate apparentiarum in vtroque systemate; non autem pro maiori, minori, vel æquali commodo contemplantis, unde constat te respondendo tempus inutiliter terere, nec pro tua causa quidquam efficere.

Secundum argumentum defendendum à Lansbergio selectum est istud. Pag. 39. solutionis meæ, Origano & Kepplero dicentibus Cælum & Solem moueri, Terram autem quiescere, perinde esse, ac si coquus ineptus carnem veru fixam vertere dedignatus, ignem potius circa carnem circulo circumageret vel (vt vult Ph. Lansbergius) ac si mater liberis inuoluendis intenta præposterè ignem circa illos circumuerteret. Respondebam hæc legitimâ quæstione; si Copernicani perabsurdum putent Solem moueri circa Terram & non potius hanc breuissimè circumuolui in conspectu Solis; immobilis cur non idem dicetur de Terra & Luna vel cæteris planetis, quos tamen circa Terram & huius gratiâ moueri concedunt? Ad hanc verò quæstionem respondet Lansbergius, *id non fieri, quia fieri nequit: inuiolabilis quippe impossibilitatis necessitas hîc impedimentum ponit.* Sed quænam est hæc impossibilitatis necessitas? *Quia (inquit Lansbergius) Terræ motus dari vel describi nequit, qui Lunâ quiescente omnes apparentias nobis exhibeat in Cælo, quas Luna motu suo conficit.* Sed vt pateat quàm Philosophica & Mathematica sit hæc tua responsio, quàmque profundè in ea reddenda Copernici thema contemplatus fueris, scito quod si Luna in quouis Eclipticæ puncto esset immobilis, Tellus autem motu diurno & menstruo circumferretur in orbita Lunæ; apparerent omnes eius cum Sole Sizygiæ ipsiusque Lunæ motus sub Zodiaco: Si vero Luna insuper annuo motu ferretur in Ecliptica; omnes eius etiam coniunctiones, oppositiones & quadraturæ cum Sole in singulis signis apparerent, vt hæc omnia nunc apparent; nec propterea in vtrouis casu Luna circa Terram volueretur, quod tamen asseris impossibile. Vides ergo cœlestes apparentias multifariam esse possibiles, idque fatentur omnes Astronomi. Ac propterea absurdum esse opinari primariam DEI intentionem in Mundo ordinando fuisse cœlestes apparentias exhibere, & potius oculorum spectantium, quàm rerum generandarum necessitatis rationem habuisse.

Tertium argumentum est istud. Pag. 31 & 32 solutionis meæ negabam Ph. Lansbergio impossibilitatem motus primæ sphaeræ ob eius magnitudinem. Cùmque Sol & Terra sint corpora mobilia ex Copernicanis; quærebam ab illis, vt determinarent ad quam vsque molis quantitatem pro corporis motu liceat ascendere, & vltra quam corpus mobile non sit amplius mobile, huiusque causam assignarent. Ad hæc verò maximè vrgentia nihil omnino respondet Iacobus Lansbergius; Verba verò sequentia mihi imponit. pag. 10. *Sed instat Morinus atque pag. 31. 32. & 70 expressè innuit: celerem motum octauæ sphaeræ, celeritatis suæ causa non magis absurdum videri debere & Naturæ contrarium, quàm magna & immensa illa vastitas quam Copernicani stellis fixis & sphaeræ stellarum fixarum tribuere coguntur.* Verùm neque hæc verba nec sententiæ illis expressæ vsquam habentur in illis paginis, ideoque te insignem scripturarum falsificatorem hîc prodis. Dixissem minùs absurdum, non autem non magis absurdum. Eo autem libentiùs te falsarium appello, quòd passim talem te præbeas, illudque vitium in me retorquere nequeas, qui in tuo aliorumque textu referendo sum ingenuus & fidelis, nec pro veritatis defensione vllâ indigeo falsificatione, infœlici patronâ falsitatis.

Videamus autem quid & quàm aptè respondeas ad illa verba conficta: Dicis ergo *Me non rectè perpendisse Naturam in augmentandis magnorum corporum dimensionibus, proportionaliter in immensum progredi: in motibus etiam celerrimis proportionaliter accelerandis, non ita progredi: quam ob causam Mundi illa vastitas DEI & naturæ operandi modo consentit: Contra motus celeritas octauæ sphaeræ ab eo dissentit plurimum.* Sed primò hæc sunt aliena à quæstione superius à me facta; nec eam attingunt, multò minùs soluunt. Deinde ais *Naturam in augmentandis corporibus proportionaliter progredi in immensum, non autem in motibus accelerandis;* Sed hoc minimè probas, neque cur non possit in motibus eodem modo progredi; visque tibi credi cæca fide vt tuo credis Caluino. Denique falsum est quod asseris. Nam ex ipsa tui Patris Vranometria (quam saltem circa hoc consulere debuisses) Luna est minor quàm Terra vicibus 45  $\frac{12}{10}$ ; Mercurius vicibus 12: Mars 8; Venus 3  $\frac{1}{2}$ : Iupiter autem maior est Terrâ vicibus 25  $\frac{3}{4}$ : Saturnus 46  $\frac{2}{3}$ ; Sol 434. At stella fixa sexti siue minimi ordinis maior est quàm sphaera Terræ seu corpore cuius circulus maximus



ximus est magnus orbis vicibus  $11\frac{1}{2}$ ; stella quinti ordinis, vicibus 92. &c. sed inter has dimensiones nulla est proportio arithmetica, geometrica vel harmonica; quid igitur de tota tua responsione censendum sit omnes iudicent.

Ad mea verò verba pag. 31. maioris esse potentiae Cœlum ex nihilo creasse, quàm illud mouere quantacunque sit finitæ magnitudinis. Respondes pag. 10. *Cœlum ex nihilo creare, absolutum DEI, non Naturæ aut creaturæ alicuius opus esse: Cœlum autem quotidie mouere, non absolutum DEI, sed creaturæ & Naturæ opus esse; proindeque quia relictis ordinarijs Naturæ operandi modis omnipotentia diuina mantello me defendere cogor, me causam meam prodere: Sed vel in textu meo legendo oculi, vel in eo intelligendo mens tibi defuerunt. Nam dum ibidem assero Cœlum moueri posse vel à seipso si DEVS illi congruam vim motiuam dederit (quod potest) vel ab Intelligentia proportionatæ virtutis; vel à DEO solo illius volente motum, relinquo ne ordinarios Naturæ operandi modos vt falsò asseris? O quàm turpiter tua causa à te defenditur! Et quàm malè etiam legisti vel intellexisti Commentationes tui Patris pag. 41. vbi suas exponēs pro Telluris motu pias meditationes (quibus enucleādis puderet immorari) de Telluris causa morricè sic loquitur. Ipse ergo (DEVS) solus est qui stabilit Terram, & filios hominum manu gestans, pie matris instar ab omni incommodo tuetur & conseruat. Et paulò post. Et hinc quoties cum Terra ad Solem circumuoluimur, cogitandum est DEVM nos vlnis gestare & pie matris instar Soli tanquam luculento foco obuertere. Hic ergo Pater Tuus DEVM agnoscit pro vnico motore Telluris; quam meis ratiunculis coactus es fateri pag. 27. te ignorare à quâ causa moueatur.*


Sed pergamus ad quartum argumentum sedulò aduertendum. Pag. 52 solutionis meæ Respondebam Kepplero & Mæstlino quærentibus qua ratione fieri possit vt toto Mundi systemate circumagitato, vnica Terræ globulus non vnà circumrapiatur; quod etiam impossibile esse ait Ph. Lansbergius pag. 103. progym. Atq; dicebam Terram ex se corporum omnium maximè repugnantem motui circulari (vt fatetur ipse Kepplerus) iure in eum Mundi locum ablegatam fuisse, vbi non solum minimè vigeat, sed etiam definit mundanæ machinæ motus circularis. Respondet autem Iacobus Lansbergius, *Hoc dato & non concessò, non sequi tamen in eo loco*

*motum octauæ Cæli ex sua natura desinere. Nam in omnibus sphericorum corporum motibus partes omnes à summo usque ad imum mouentur solo mathematico centro excepto, Terra autem non est tale centrum.*

Verùm quia Lansbergius sumit Mundanam machinam pro vni-  
co globo sibi continuo, cùm tamen sit congeries plurium globorum  
& diuersarum specie regionum sibi superpositarum ac tan-  
tùm contiguarum, patet inde responsionis eius absurditas.

Subiungit Lansbergius, *sed inquit Morinus in sphericorum corpo-  
rum motibus partes à centro remotiores celerius, centro autem viciniores  
tardius mouentur. Ergo circa mundanæ machinæ centrum, motus totius  
Cæli ex sua natura elanguescit & terminatur. Non sic concludo  
Lansbergi, nec ea conclusio nec eius deductio in meo textu repe-  
rietur. Antecedēs enim à te truncatum, enunciatum à me de globo  
continuo contra Kepplerum, volentem motum Telluris globi  
continui esse à centro: consequentia autem à te conficta intelli-  
gitur de Mundi machina sibi non continuâ; atque idcirco quæ  
rectè disiunxi, malè copulasti. Vnde constat te passim textum  
meum falsificare; alterum in hoc fortassis falleres, me autem falle-  
re non potes; meus enim & loquendi & ratiocinandi modus mihi  
nimiùm innotescit, doleoque plurimùm quod cùm meam synce-  
ritatem commendaueris, par tibi referendi omnem ansam mihi  
adimas. Sed quid responder Lansbergius ad hæc à se contexta?  
Ecce eius verba. Respondeo partes æquales centro viciniores tardius qui-  
dem moueri: proportionales autem æquè velociter ferri tam circa centrum  
quàm in ipsa circumferentia: Ac proinde falsa est Morini collectio quâ con-  
tendit motum mundanæ machinæ versus centrum simpliciter elanguescere,  
vt sequens diagramma ostendit.*

*Sint, inquit, in adiuncto schemate in mobili sphaera tres circuli concen-  
trici, qui simul moueantur circacentrum A. F in  
G moto, D in E mouebitur & B in C (debebas  
igitur addere eodē tēpore;) Atqui FG, DE,  
& BC sunt partes seu arcus proportionales, Er-  
go vt ex adiuncto diagrammate patet partes pro-  
portionales paruorum & magnorum circularum  
in unicâ sphaera æquè velociter mouentur, neque  
istorum circularum motus, vt Morinus contēdit,  
simpliciter elanguescunt. Et per consequens octa-*





*ua sphaera mota à puncto F in G, sphaera Luna à puncto D in E fertur; & Terra ambitus à puncto B in C. quoderat demonstrandum.*

Sed quid demonstraſti Lansbergi? Nil certe aliud quàm tuam incſciam & valde craſſam. Nam ex Ariſtotele in Phyiſicis ea dicuntur æque velociter moueri quæ eodem vel æquali tẽpore æqualia percurrunt ſpatia: Atqui ſi angulus FAG ponatur eſſe 6 graduum arcus BC in ſuperficie Terræ, valebit ſub Æquatore 90 milliaria germanica: arcus DE in ſphæra Lunæ & minima eius plenæ diſtantia, valebit 4860 milliaria, arcus autem FG in ſphæra fixarum valebit 168168 168180 milliaria germanica, ex tui quoque Patris Vranometria: ſuntne hæc æqualia ſpatia, mi Lansbergi? Nonne vides quod cùm hi tres motus fiant eodem tempore, motus eſt velociſſimus in ſphæra fixarum, longè tardior in DE, & tardiſſimus in BC? quodque homo vnâ horâ percurrens vnâ leucam dici nequit æque velociter moueri, ac alius qui eadem horâ percurrit 1000000 leucas? proindeque Mundanæ machinæ motum à ſuperficie verſus centrum elanguere vt ſuperius aſſerui?

Præterea ſi tuum ſchema eſſet de vno tantùm globo continuo, verum quidem eſſet partes omnes proportionales (vt vocas) à ſuperficie ad centrum eodem tempore eundem angulum peruadere; at de ſchemate diuerſorum corporum ſibi tantùm contiguum falſum eſt. Dic mihi an dum pileum tuum circa tuum caput conuertis à parte poſtica ad anticam, etiam ſimiliter caput tuum conuertatur? Poſſet tamen valere demonſtratio mea de ſyſtemate diuerſorum corporum ſibi tantùm contiguum, ſed arctiſſimè compactorum minimèque fluidorum; at ſi adfuerint corpora fluida atque cedentia, hæc denſa minimèque fluida ſibi ſubiecta in ſui motus conſortium non pertrahent; quod patet de Aëre & Aquâ circa Terram ſubiectam expanſa; quæ quia fluida ſunt, circa illam fluunt, nec eam circumferunt; ideoque in Terræ ſuperficie deſinit mundanæ machinæ motus.

Certè longè veriſimilius eſt iſtud argumentum cuiuſdam noſtratiſ Mathematici. Rationibus mechanicis omnibus repugnare vniuerſam Mundi machinam ad Terram vſque circumferri, Terram autem in centro quieſcere: quòd nimirum eâ in æquilibrio poſita, neceſſe ſit ipſam à minima vi circumſtante impelli & circumferri.

At ego breuiter respōdeo. Rationes mechanicas siue mathematicas & experientias physicas sibi ad amussim non semper congruere. Constat enim quod si in magnis lancibus mercatorum duo appendantur pondera in æquilibrio, secundum rationes mechanicas addendo vni eorum vnicum granum vel duo grana deberet inferiùs descendere, æquilibrio interrupto: quod tamen nequidem fiet additâ dragmâ integra, & tamen in minimis lancibus fieret contrarium. Sic ergo quamuis vniuersa Mundi machina ad Terram vsque circumferatur, vt ex Aëre quoque infimo euidentissimè patet sub Æquatore: Tamen quia vt supra ostendimus motus prope Terram est languidissimus, ideoque solùm perceptibilis sub Æquatore maxima mundi vertiginè: ac præterea Aër Terræ contiguus est naturæ omnium tenuissimæ & fluidissimæ; hinc fit vt vis eius languida ad pondus Terræ stupendum comparata, minùs adhuc possit quàm dragma vna in supradictis ponderibus: Estque multò mirabilius cur Oceanus suo fluxu atque refluxu Telluri motum reciprocum non conciliet; cuius tamen vim ad illud insufficientem esse, quòd fluidus sit necessariò dicendum est.

Iam verò tempus adest seriò examinandi scientificum Ph. Lansbergij argumentum, à Iacobo Lansbergio toties in sua Apologia in laudem sui patris decantatum. Id verò paucis facturus sum quamuis Lansbergius toto tractatu quarto mirè se torqueat vt illius argumenti veritatem persuadeat; quid enim pluribus opus est vbi pauca sufficiunt? Pudore autem imprimis confundor pro vtroque Lansbergio Patre & Filio, idque duabus de causis. Prima quòd impudenter glorientur de inuentis Copernici & Keppleri, qui Telluris motum in Ecliptica primi demonstrarunt æquè scientificè ac Ph. Lansbergius. Secunda quòd quamuis vndeque & verbis & scriptis de demonstrationis absurditate moneatur & conuincatur Lansbergius; pertinacissima tamen ignorantia illam tueri & extollere non desinit in sua Apologia.

Primò igitur Philippus Lansbergius pag. 18. suarum commentationum in Terræ motum demonstrare nititur: *quod si iuxta Ptolemaeum & Tychonem Terra ponatur immobilis in centro, & Sol mobilis in Eclipticâ; Luna motus Cælo vel apparentijs congruus inde ostendi nequeat.* Cuius demonstratio eiusque mea refutatio habentur pag. 16. meæ



Solutionis, idemque asserit Iac. Lansbergius pag. 69. In ipsa autem refutatione ostendo Philippum Lansbergium supponere falsum: quippe Lunam ab vno nouilunio ad aliud, vnicam tantum absolvere gyrationem in proprio orbe, tantumque redire ad idem sui orbis punctum in quo fuerat præcedenti nouilunio. Ex quâ falsâ suppositione sequitur Ph. Lansbergij falsa conclusio. Tibi verò Iacobe Lansbergi probandum nunc erat, tuum patrem vel id non supposuisse, vel saltem non falsò, sed rem sic se habere. Horum verò nihil effecisti: imò in tua Apologia eandem cum patre supponis falsitatem; tanta est tua cæcitas dum me in hoc præfertim tractatu 4. ignarum, momum, excæcatum, sciolum, incredulum, nugatorem & aliis nominibus appellas; nec me Patris tui argumentum intellexisse asseris: Illud ergo tibi probandum remanet.

Posthæc verò Ph. Lansbergius pag. 19. suam struit demonstrationem scientificam motus Telluris in Ecliptica, quam hæc verba præcedunt. *Restat probandum alterum; scilicet Lunæ motum in Zodiaco exactè conuenire cum eo quem in suo orbe & Sol in Ecliptica peragit, si* (Notate) *Terra circa Solem mobilis, isque in Mundi centro immobilis statuatur. Rei veritas manifesta erit ex sequenti figura, &c.* Quamuis autem ex illis duobus tantum suppositis, conclusionem suam nequeat Ph. Lansbergius deducere; sed insuper tria supponat vel assumat, nempe Terram percurrere in Eclipticâ singulis lunationibus 29. gra. 6'. Secundò Lunam simul cum Terra per Eclipticam incedere in Epicyclo. Tertio Lunam ipsam singulis lunationibus sui Epicycli totam peripheriam siue 360 gr. exactè peragere. Tamen concessum est Copernico, Kepplero, & iterum cõceditur Lansbergio, quod ex illa totali hypothese ostendi potest Lunæ motus Cælo vel apparentiis consentaneus. Quod autem ex hypothese Terræ in centro Mundi quiescentis æquè consentaneus ostendi nequeat, sed per solum Terræ motum in Ecliptica, vt ait Iac. Lansbergius pag. 67. 71. 73. 76. 77. &c. est falsissimum: tantumque abest vt Lansbergius id ostendi non posse probauerit, quin potius fateri cogitur pag. 73. 76. & 78. *ex hypothese Terræ quiescentis fingi posse causas Lunarium apparentiarum; neque id negasse Ph. Lansbergium, neque vnquam in dubium vocasse, neque sua demonstratione impugnasse; quod rursus est falsissimum, cum id sua falsa demonstratione directè impugnauerit, non autem expugnauerit.*

Nec aliquæ tantùm redduntur causæ apparentiarum ex hypothesi Terræ quiescentis vt ais perperam pag. 73; sed omnes vt luculentissimè etiam testatur Kepplerus lib. 6. Astr. pag. 749. his verbis. *Omnia hæc & singula si quuntur sanè etiam ex hypothesi Bræhe, &c.* Nec etiam finguntur vt passim asseris, sed desumuntur ex sacra scriptura, cuius locum explicauit pag. 138. meæ Solut. à te nequidem tentatum: Ex Aristotele, Ptolemæo, Tychone cæterisque omnibus rectè philosophantibus; tandemque à rationibus & experienciis physicis, quas quàm egregiè dilueris (quod iactas) patebit infra. Ex quibus omnibus constat in hoc saltem verum dixisse Ph. Lansbergium Comm. pag. 1. & 2. *Sphæras Ptolemæi & Copernici quoad apparentias non magis inter se differre, quàm viam quæ Athenis Thebas ab ea quæ Thebis Athenas ducit; nec sphæram Copernici alias à Ptolemæica in Cælo exhibere apparentias;* cuius tamen deinde contrarium sua falsa demonstratione suprapositâ conatus est ostendere, tam benè bonus ille senex sibi constabat. Tu verò eius dignissime fili, ineptè ais me locum illum appositum pag. 14. meæ Solut. non intelligere, quasi difficultatis aliquid inuolueret: & quia illum in tuum patrem efficacissimè retorqueo nec te potes ab eius veritate expedire, impatientiâ & bile succensus ais me *inquit*: Et pergis hisce verbis. *Ipsè enim Lansbergius loco à te citato seipsum satis explicat; discrimen enim ponit vtriusque sphære, verbis quæ tu pro tuo candore dissimulasti, scilicet Astronomiam Ptolemæi multùm differre à Copernicæâ, quòd illa speciem, hæc præter speciem, rem ipsam præbeat conspiciendam.* Falleris Lansbergi, nec tui Patris scripta intelligis, vel saltem dissimulas. Siquidem verba hæc non apponuntur ad explicandum locum supradictum, sed ad reddendam rationem cur Copernicus hypothesibus Ptolemæi reiectis suas substituerit, manente apparentiarum paritate: videatur locus integer pag. 2. Comm. & quis nostrum peccet ignoratione Elenchi. Imò ex iisdem verbis omnino confirmatur locus supradictus; quippe Astronomiam Copernici & Ptolemæi in hoc conuenire, quòd vtraque speciem rei (hoc est easdem apparentias) præbeat conspiciendam, idque certe concedo, & à te quantumuis inuitò concedatur oportet: At quod Copernicæ præter speciem, etiam rem ipsam (hoc est motum Telluris in Eclipticâ) præbeat conspiciendam: id nego tibi probandum est. Hucusque paulò fui prolixior vt caliginem & nebulas



omnes discuterem, quas in fauorem demonstrationis scientificæ nititur offundere Lansbergius, illiusque fucum extergerem; sicque illa coram rationis Sole conspicua, primo intuitu falsa deprehenderetur.

Igitur postquam Ph. Lansbergius demonstrare conatus est, quod posita Terrâ quiescente in Mundi centro, non sequatur inde Lunæ motus Cælo consentaneus (quod tamen tantum abest ut demonstrauerit, quin potius sibi omnino multoties contradicendum asserit cum Kepplero sphæram Copernici non alias à Ptolemaica vel Tychonica exhibere apparentias.) Demonstrauit autem quod posito Terræ motu in Eclipticâ, sequatur Lunæ motus Cælo consentaneus: sic deinde quasi delirando concludit. *Nam cum ostenderimus Lunæ motum non esse Cælo consentaneum, si Terra in Mundi centro quiescat. Esse autem, si motus ei in Eclipticâ tribuatur, necessario sequitur non Solem moueri, sed Terram, eumque esse in Centro Eclipticæ, non hanc, quod erat demonstrandum.*

Ecce illius senis demonstrationem scientificam à Iac. Lansbergio toties inculcatam: quæ solis etiam Logicæ tyronibus nuda exposita, falsitatis conuincetur, quippe quod falsum assumat, imò à demonstrante negatum, nec alia indiget refutatione, utcunque Iac. Lansbergius per suos tractatus & capita sese torqueat verbaque perdat. Insuper verò quis non videt illam non esse minus circularem, quàm Telluris vestrum motum in Eclipticâ? Quippe ex Telluris motu in Eclipticâ ostendit Lunæ motum Cælo consentaneum, deinde ex hoc motu consentaneo concludit atque demonstrat illum Telluris motum, quod rursus est mera petitio principij: cum tamen omnis legitima demonstratio rei, fieri debeat ex veris & notioribus conclusionibus huiusque causis; quod quidem fateris pag. 87. hinc verò non obseruas. O felices igitur Belgæ quibus licet pro tam patulis nugis de vestrorum illustrium Ordinum heroica liberalitate gloriari, quod nonnullis pro ipsa veritate non licet! Tandem aliquando ab inani laude illius scientificæ demonstrationis cessate & ingeniorum vestrorum caliginem excutite, ut videatis quantum illa differat à demonstratione Eclipsium, cui ipsam comparatis.

Cæterum respondeamus Iacobo Lansbergio valde attonito ut hæc eius verba ostendunt pag. 82. *Incompertum & incomprehensibile*

*est quomodo fieri possit, ut ex positione & causa falsa, tot veri effectus necessariò consequantur; non autem ex positione vera.* Falsa sunt hæc tua postrema verba Lansbergi: Nam positâ Telluris quiete in centro, totidem veri effectus necessariò consequentur, ut superius ex Te tuoque Patre conuincitur: At quod etiam apparenter sequantur ex Telluris motu falso in Ecliptica; rationem habes accuratissimè demonstratam cap. 6. meæ solutionis; quam feci ipsius solutionis præcipuum fundamentum, cuique etiam assentiri pag. 5, sed eâ ibidem malè vteris. Nimirum perinde esse siue visus siue res visa moueatur: Quod tamen tantum venit intelligendum de rei apparentia, non de rei veritate: Nam si naui ponatur quiescere apparebit quidem littus moueri, non tamen verè seu à parte rei mouebitur. Nec ita attonitus esse debes quod ex falsa positione sequantur vera multa & falsa. Nam si quidam homo ponatur esse asinus, necessariò sequetur quod sit animal, viuens, corpus, substantia, ens; & hæc vera sunt; sed etiam necessariò sequetur quod sit quadrupes, rudibilis, &c. quæ falsa sunt de homine ipso; hoc pete à Logicæ tyronibus, nec amplius Tibi sit incomprehensibile.

---

### CAPVT III.

*In quo meorum argumentorum contra Telluris motum solutiones à Iacobo Lansbergio redditæ, examinantur.*

**Q**UANTO candore soliusque veritatis studio, rationes à Iac. Lansbergio defendere susceptas capite superiori euertirim, lectores ingenui iudicent. Nunc videndum an idem fecerit Lansbergius de rationibus meis pro Telluris quiete excogitatis, quas parui momenti ratiunculas appellat, seque vna operâ diluturum iactat.

Porro in meis rationibus impugnandis tria vafer homo obseruauit. Primò sibi cauit ab iis quibus diluendis se imparem censuit, easque solùm aggressus est, quas debiliores malè opinatus est: Secundò earum plures aut falsificauit, aut diuulsas malè contexuit. Denique singularum fundamenta dolosè subticuit, omnesque solâ



solâ superficie tenuis attingit, ne in profundo mergeretur, quod vocat vna operâ ~~deluere~~. Hicne tuus candor Lansbergi, & veritatis amor? Quinque tractatus contra Fromondum atque Bartholinum circa apparentias cœlestes & scripturarum explicationem inutiliter protulisti & me vix duobus capitulis dignatus, rationes meas hæcenus inauditas cursim pertransis, vt canes Afri pavimentum Solis ardore torridum, pedum vstulatione coacti percurrunt. Sed inde mihi videris excusandus, quòd nemo ad impossibile teneatur. Incipiamus ergo mearum rationum discussiones tuas discutere.

Primùm ergo pag. 76. 77. 78. meæ solutionis, ex hypothési Copernicanorum concludo CHRISTVM dum in Euangeliiis dicitur ascendisse ad Cœlum, non ascendisse ad Cœlum, sed è contra descendisse. Lansbergius autem respondet pag. 106. *Demus Christum in meridie ascendisse, quis tamen inde rectè inferat per Hypothesin Copernici fidem nostram labefactari? quia ascensus & descensus ex illorum genere sunt quæ ad aliquid dicuntur. Vt ergo Morini pater verè filius dici potuit patris sui respectu; ita Christus verè dici potest Terræ respectu ascendisse: neque hîc falsitas aliqua in fide nostra offendi potest.*

Misereor tuæ sortis Lansbergi, ostendam enim Te in meis rationculis impugnandis adhuc infœliciozem esse, quàm in tui Patris rationibus defendendis, teque non modò intellectum, sed voluntatem etiam habere à veritate prorsus aliena: Cur enim dissimulasti meæ conclusionis fundamenta, eaque relinquis intacta, nisi quia ijs respondere nequis? Et solùm tentas ignaris illudere cum tua imperfectissima comparatione? Nam patri meo Petro Morino (cuius anima in DEO quiescat) duos tribuis terminos scilicet patrem suum Franciscum Morinum & me; quorum ratione dicitur & filius & pater. CHRISTO autem ascēdenti das vnicum terminum, nempe quod ascenderit Terræ respectu siue à Terrâ: at cum ascensus concipi nequeat sine duobus terminis à quo & ad quem; vbinâ est terminus ad quem, quem dolosè subitices? Scriptura sacra dicit ad Cœlum, hypothésis autem Copernicana hoc dicere nequit nisi falsò. Nam dum CHRISTVS à Tellure recedebat, non accedebat ad Cœlum, sed ab eo recedebat ex Copernicanis: quis autem hominum mentis compos dicet à Cœlo recedere, esse ad Cœlum ascendere? Igitur nulla est quidem

falſitas in fide quod CHRISTVS Terræ reſpectu dicatur aſcendiſſe; ſed eſt falſitas in fide, quod fides dicat aſcendiſſe in Cœlum, hypotheſis autem Copernicana dicat non aſcendiſſe, ſed è contra è Cœlo deſcendiſſe, legantur pag. illæ 76. 77. 78. meæ ſolutionis.

Iam verò tempus adeſt vt tuas diſcutiam reſponſiones ad meas rationes aſtrôlogicas. Et quidem in ſuperioribus minori excuſatione dignus videris, ſunt enim tantum phyſica vel aſtronomica; in his autem aſtrôlogicis maiori; quippe quòd minimè vulgaria ſint, ideoque mirum non ſit quod in iſtis tua pateat inſcitia. Attamen in meis rationibus ſpernendis (quas nugæ maximas, friuola cauilla, commenta, tenebras & chimeras appellasti) Tibi autem triumpho citra victoriam decantando, tanta uſus es inſolentiâ; vt inde inanis gloriæ loco dedecus non minimum ſis reportaturus. Et ego dereliçto homine ignaro ſcientiæ totius Phyſices altiffimæ, diuiniffimæque, conuertar ad Aſtrologiæ magiſtros, quos ſolos huius cauſæ Iudices accepto.

Secundò igitur pag. 40. 41. 82. 83. 84. præmiſſis aliquot fundamentis oſtendo pag. 84. 85. quod ſi Tellus ponatur in Ecliptica & Sol in centro vniuerſi; Saturnus exempli gratiâ ſit cum Cœlo acturus in Solem & non in Terram cõtra experientiam: Et demonſtrationis rationes habentur in fundamentis à Lanſbergio more ſuo prorſus intactis omninoque diſſimulatis.


Ipſe verò Lanſbergius pag. 107. Apol. ait. *Illud argumentum eſſe inualidum & Mathematico indignum; Præſupponit enim ad efficaciæ Cœli influentiam rectam radiorum directionem requiri, quâ ſcilicet ad Mundi Centrum ferantur; quod commentum ipſa hypotheſis Terra quieſcentis explodit.*

Hic autem reſpondeo. Me non præſupponere quod ait Lanſbergius; ſed oſtendere validis rationibus ab illo diſſimulatis & quibus etiam uſus eſt Kepplerus lib. 4. Aſtron. copern. pag. 448. ubi ait quod Sol æquabilius & rectius totum Mundum ſphæricum illuminat in centro quieſcens, quàm circumeundo circa illud in Ecliptica: Nam ſi accederet aliquas partes calefactionis cauſâ, recederet ab oppoſitis, cauſareturque viciffitudines ipſe exiſtens ſimpliciſſimus. Et paulò poſt affert aliam rationem meæ ſimilem de combuſtibili, quod in ſolo foco ſpeculi concaui accenditur, & non in alio puncto ob radiorum reſtitutionem. Quod ergo de Sole totum Mundum calefaciente &



illuminante Kepplerus verum putat, verius assero de Tellure à primo Cœlo concauo eiusque influentijs Kepplero ignotis patiente. Nimirum quod in solo Cœli centro siue foco fiat vndique concursus radiorum influentialium; angulis siue radiis rectis; proindeque in eo solo & non extra Tellus æquabilissimè & efficacissimè afficiatur.

Porro quod ad efficacem Cœli influentiam recta radiorum directio ad centrum requiratur, ita demonstrat Lansbergius esse commentum. *Sit enim in eadem proposita figura circulus BILB Telluris globus, atque eius centrum A. Si verum est quod Morinus vrget, partem Cœli DE cum Saturno C, vim suam tantùm efficaciter dirigere per rectum radium ad Mundi centrum; tunc pars Cœli DE cum Saturno, non influet in punctum Telluris B; sed pars illa Cœli DE tantùm efficaciter influet in exiguam globi terrestris particulam IL, in Terra correspondentem visibili diametro Saturni: quod est absurdum & proprijs Morini assertis repugnat.*



An non vobis ô Mathematici hæc arridet demonstratio quæ est tantùm mera negatio? Verùm vt pateat quàm absurdè absurditatem intulerit Lansbergius. Notum est apud omnes Astrologos, planetas in Tellurem agere tribus præsertim modis. Nimirum corporeo situ, dominio & aspectu, esseque actionem corporeo situ omnium efficacissimam, de qua meam & Lansbergij demonstrationem intelligi vel tyronibus palam est.

Iam verò erecta Cœli figura in quouis Terræ loco, & Cœli Terræque diuiso ambitu in suas 12 domos astrologicas virtute specifica differentes; etiam tyronibus constat, quod si Saturnus fuerit situ corporeo in prima domo quæ est vitæ seu constitutionis corporis & animi; Saturnus ipso situ corporeo non influit circa Nati Magisterium, morbos, itinera, mortem, &c. sed tantùm circa

corporis & animi constitutionem : Cuius vnica ratio est quia Saturnus & pars Cœli quam sua visibili diametro abscindit situ corporeo, simul incumbunt illi tantùm Terræ parti quæ prima domus appellatur, radio ad centrum Cœli directo; dico autem Cœli, quòd virtus radij oppositi deprehendatur esse in Cœlo diametralis vt infra patebit. Ergo planeta suo situ corporeo tantùm agit influentialiter radio ad centrum Cœli directo, cum eâ parte Cœli quam abscindit suâ visibili diametro : idemque dicendum est de figuris erectis non pro aliquo nato, sed pro alicuius regionis constitutione generali ex mente Ptolemæi, sicque patet euidenter absurda Lansbergij conclusio.

Quod autem ait pag. 108. *Me assertis meis repugnare*, falsum est, & textum meum ibidem falsificat, nec tamen inde quod intendit colligere potest. Dixi quidem pag. 92. Terram esse in centro vel vtero Cœli, per quem totum vis Cœli quælibet diffunditur; eamque esse veluti punctum ipsius Cœli respectu; & à radiis influentialibus affici quantùm possunt, ideoque penetrari seruata radiorum rectitudine; in quæ verba non intellecta infaustè Lansbergium impegisse contigit. Iis enim omnino constat quod si Terra sit ferè punctum Cœli respectu; Et tamen ea in centro Cœli collocata atque in suas domos diuisa, velim influentialem actionem planetarum & Cœli per situm corporeum, fieri rectitudine radiorum ad centrum, vt supra à nobis explicatum est: nequaquam mihi contradixi; nec volui quamlibet Telluris partē affici rectitudine eiusdē radij, quod mihi imponit Lansbergius; longēque abfui ab eius sententia qui Terram in Ecliptica collocans procul à concursu radiorum influentialium, ait nihilominus eam eodem modo affici, ac si esset in centro ob semidiametrum magni orbis, respectu Cœli vt voluit insensibilem: sed Legantur pag. 85. 86. & 87. meæ solutionis rationes in contrarium, quas Lansbergius reliquit intactas, tum quæ infra sequuntur.


Tertiò pag. 88. 89. 90. meæ solutionis demonstro, quod si Tellus circa Solem gyret in Ecliptica, saltem efficacius afficietur virtute dodecatemorij sub quo illa mouetur, quàm dodecatemorij oppositi sub quo Sol conspicitur, & à quo Tellus ipsa longiùs distat; quod tamen experientijs Astrologicis repugnat euidentissimè.

Respondet Lansbergius pag. 108. & 109, Apol. *Legem actionis in*



*magis vel minus distans hîc locum non habere : quia siue Terra in vna Ecliptica parte sita sit siue in alterâ ; ad sensum & quoad apparentiam aque à Cælo 8. semper distat ; quia Ecliptica est Mundi centrum apparens. Cum ergo maior vel minor illa vicinitas ad Cælum octauum insensibilis sit, sensibilem in operando differentiam nequit introducere.*

Dico autem hoc vnicum superesse Copernicanis omnibus effugium à meis rationibus Astrologicis, quo propterea solo aduersus omnes vitur Lansbergius; At quàm vanum sit ita ostenditur. Imprimis enim contrariatur Kepplero qui superius noluit, Solem moueri in Ecliptica, ne totam Mundi concauitatem inde inæqualiter calefaceret & illuminaret. Deinde in agentibus in distans lex hæc irrefragabilis est, cunctaque sistit effugia. *Virtus agentis naturalis in distans eò remissior est, quò est à suo fonte remotior*: Alioquin erit æque intensa vel intensior; dato autem vtrouis, dabitur agens naturale ad infinitam distantiam, ideoque virtutis infinitæ, quæ sunt



absurda. Ponatur ergo Tellus in Eclipticæ punctis oppositis C & A. Et quia dodecatemoria G Leo & E Aquarius sunt virtute paria;


si G agit in C, ergo E æquè ager in I: Atqui E validiùs agit in C quàm in I ex superiori lege in distans agentium: Ergo E validiùs agit in C quàm faciat G. Quæ demonstratio cùm necessariò concludat etiamsi distantia inter C & I esset vniustantum milliaris germanici, quantò euidentiùs posita illa Eclipticæ diametro 5154840 milliariorum germanicorum ex Ph. Lansbergio? Constat igitur euidentiùs quod posita Tellure in Ecliptica, dum hæc mouetur sub Aquario validiùs affici debeat ab Aquario, quàm ab opposito Leone; cùm tamen experientia doceat contrarium, differentiâ etiam maxime sensibili Astrologorum iudicio: cui nihilominus experientiæ & rationi omnino refragatur Iacobus Lansbergius dum vult *maiozem vel minorem illam vicinatem ad Cælum* 8, *sensibilem in operando differentiam non posse introducere*. Non ergo Tellus est in Ecliptica; vanumque est Copernicanorum commentum quod *Ecliptica sit tantum apprens Mundi centrum*: Cogentur enim eodem modo asserere, quod si diameter sphæræ fixarum esset diameter Eclipticæ, & hæc adhuc esset insensibilis magnitudinis respectu sphæræ fixarum superauctæ in immensum; fixa agens in ipsius Eclipticæ partem aliquam, æque sensibilitèr ager in oppositam & remotiorem 928800000000 milliaribus germanicis ex Lansbergij calculo: quæ absurditas quantum repugnet legi in distans agentium superiùs patet.

Duobus argumentis superioribus actum est de modo agendi astrorum per situm corporeum & dominium; iam sequitur modus agendi per aspectum. Quartò igitur pag. 90. 91. 92. meæ solutionis, ostendo per hypothelin copernicanam destrui veram rationem aspectuum; videatur discursus.

Respondet autem Lansbergius, *Totum meum discursum fundamento carere*, quippe quòd pag. 107. asserat esse commentum astra cum Cælo agere *influentialiter per radiorum directionem ad Mundi Centrum*; quod est mei discursus fundamentum, in solutione meâ & superiùs quoque sic demonstratum, vt Lansbergio & cuius alteri impossibile sit illud euertere. Deinde verò in eadem figura, posita Tellure C, Venere B, Marte D, Sole A, assero quod Venus B & Mars D, sint virtute coniuncti in eodem radio AE sub eadem primæ causæ siue Cæli virtute E: At tamen respectu Terræ C dicentur à Copernicanis virtute oppositi: Et in hac oppositio.



ne Venus B, dicetur agere in Terram C per virtutem primæ causæ G: quam actionem nego possibilem; quòd Venus B sit extra radium GA, in quo solo viget virtus ipsius G; quæ terminatur in Sole A.



Respondet Lansbergius, Quod è contra Venus B & Mars D virtute sunt oppositi; quodque Venus in ista oppositione agit in Terram in virtute G, & Mars in virtute E, Eius autem ratio est, quia Morini figmentum est virtutem G, siue radium GH terminari in centro mathematico A. Nam isti radij qui virtutibus Cæli subsunt, non in centro mathematico, sed in apparenti centro terminantur, illudque penetrant servatâ radij rectitudine, ut ipse Morinus rei evidentia convictus fateri cogitur pag. 92. Ac per consequens cum tota Ecliptica sit Mundi centrum apparens, tota penetrabitur à radijs influentialibus servata radij rectitudine. Et Mercurius H & Venus B suberunt virtuti G; Mars autem D virtuti E.

Hic verò & alibi passim notandum, quod Lansbergius multa asserit & multa negat; sed nihil probat, nec mea fundamenta evertit. Deinde ut aliquid dicere queat, & scripta & mentem


meam hic quoque falsificat. Vbi enim inueniet me velle virtutem E terminari in A centro mathematico, cum à contrario velim ex Copernicanis terminari in Sole, quem in Mundi centro A videre non potuit Lansbergius, & qua de re nobis erit etiam infra cum ipso dimicandum?

Nonne Copernicanis pro centro Mundi physico seu apparente sufficiet Sol, 434 vicibus ex Ph. Lansbergio maior quam Tellus, quâ pro centro physico contenti sumus, quæcunque sit Mundi moles? Præterea hic quoque notanda est Iacobi Lansbergij resistencia; etenim pag. 107. dixerat; *commentum esse Cæli influentiam agere radiorum directione ad Mundi centrum*: Hic verò vult *Venerem B agere in C virtute Leonis G, radio per Mundi centrum etiam mathematicum transeunte*. Denique ex eo quod velim pag. 87. & 92. Terram occupare Cæli vterum siue focum (quem in indiuisibili non consistere docent Optici, & visu ipso patet in speculis concauis) ibique radiis influentialibus totam penetrari seruatâ radiorum rectitudine pro effectu specifico distinguendo: An propterea inde sequitur, quod virtus G penetrare debeat Solem ex Copernicanis in ipso centro constitutum & maiorem Terrâ vicibus 434, fortèque sua substantiâ penetrationi radiorum influentialium magis resistentem? Et non modò penetrare Solem, sed adhuc corpora Mercurij, Veneris atque Lunæ, necnon media spatia inter Solem & Terram interiecta, tandemque Terram ipsam, necnon reliquos planetas si in eodem radio GA reperiuntur. Videte quæso quanta sit disparitas & quàm absurda consequentia: Quod enim Copernicani cum Lansbergio pag. 112. assumunt adeo liberaliter. *Vt se habet Tellus ad Cælum & ex Ptolemæo; ita se habet tota Ecliptica ad Cælum & ex Copernico*, Falsissimum est. Cælum enim est ante Ptolemæum & Copernicum, nec per eorum diuersas hypothesas vel opiniones, suam variat magnitudinem, quæ semper remanet eadem: ac proinde si esset eadem ratio Telluris ad Cælum 8, quæ Eclipticæ ad ipsum Cælum, Tellus & Ecliptica æquales essent *prop. 11. s. Eleni*: quod quàm sit absurdum nemo non videt. Dicent differentiam proportionis esse insensibilem respectu magnitudinis Cæli: sed esto quod sit insensibilis visui: Anne ideo sequitur quod infert Lansbergius, nullam inde oriri posse sensibilem differentiam actionis, cuius censura ad oculum non pertinet?



His verò discussis iam mihi probandum est Venerem B & Martem D non esse virtute cœlesti oppositos, vt vult Lansbergius; sed coniunctos in radio AE. Quod sic probō. Vel B & D habent formaliter ab interposita Terra C in eodem radio AE, quod sint virtute oppositi, vel non: Si hoc, ergo in nulla Cœli parte duo planetæ dici poterunt coniuncti, sub eadem virtute primi Cœli contra omnes Astrologos. Vbi enim dicentur coniuncti, nisi tales dicantur in eodem radio siue semidiametro primi Cœli? Quod si dicatur illud, contrarium ita demonstratur. Virtutes Cœli dodecatemoriales specie quidem diuersæ sunt; at non omnes oppositæ. Ratio autem cur virtutes Arietis & Geminorum non sint oppositæ, est quia inter ipsas non datur Cœli centrum; sicut nec inter virtutes Cancrī & Piscium. At virtutes Leonis & Aquarij dicuntur oppositæ; quòd inter has detur Mundi centrum. Igitur solum Mundi centrum inter virtutes Cœlestes medium, etiam omni corpore vacuum, est sola ratio formalis oppositionis ipsarum, siue partium Cœli; Idque inde confirmatur, quia quamuis totus Leo toti Aquario dicatur oppositus, nullus tamen Astrologus dicet, primum gradum Leonis opponi virtute secundo gradui Aquarij, & multò minùs tertio aut quarto; sed tantùm primo, vt constat directionibus Astrologicis; nec primum secundum primi gradus Leonis, opponi secundo secundo primi gradus Aquarij, sed primo secundo; & sic in infinitum; ob ipsam scilicet rationem oppositionis ab ipsissimo centro Cœli intermedio formaliter petitam. Quod si huius quærat demonstratio, ecce illam.

In circulo DBC ducantur duæ diametri DC & BE se rectè secantes in centro A. Nullus Astrologus dicet puncta D & B opposita, sed quadrata: Puncta verò B & E dicet esse opposita. Ducta autem utcūque recta BF, non erit in ipsa BF ratio, cur B & E sint opposita, sed erit in recta BE: Et similiter in diametro DC erit ratio cur D & C sint opposita: Cùm ergo ratio oppositionis sit in utroque diametro, illa non poterit non esse centrum A, quod solum vtrique diametro commune est: quid ad hæc Lansbergius, vel quiuis alius?



Iam verò etsi verum sit planetas B & D esse oppositos respectu Terræ C ratione situs; est tamen falsum esse oppositos ratione virtutis cœlestis: quia vt suprà ostensum est, formalis ratio oppositionis virtutis, petitur à solo centro Cœli intermedio: Atque idcirco si B esset in K, tunc K & D dicerentur respectu Terræ C oppositi virtute Cœlesti, ob centrum A intermedium. At si per Tellurem C duceretur recta ad GE perpendicularis, & vtrinque ad Cœlum terminata; terminaretur quidem ad virtutes accidentaliter oppositas ratione situs ad Tellurem intermediam; at non formaliter oppositas: quòd nempe ratio formalis oppositionis virtutum Cœli, tantum petatur à Cœli centro intermedio & non ab intermedia Terra, Marte, Ioue, vel alio globo, de quibus idem dici posset quod Lansbergius asserit de Tellure. Denique negari nequit quod B sit respectu Solis A sub virtute E: Si ergo respectu C fuerit sub virtute G: Ergo B ex se & absolutè neque erit sub virtute E, neque sub virtute G; ideoque nec sub vlla virtute Cœli, sub qua enim esse dicetur? At Cœlum esse diuisum in 12 virtutes dodecatemoriales specie diuersas, & planetam extra Cœli centrum earum nulli peculiariter subesse, non minùs absurdum est & rationi contrarium; quàm Solem vel Tellurem in Cœli centro ipsis virtutibus ex æquo non subesse. Non ergo B & D sunt virtute oppositi, sed coniuncti sub virtute E; proindeque Venus B non subest virtuti G, nec per virtutem G agit in Tellurem C. Lansbergium autem & similes Philosophos ideo errare contingit, quòd influentias lucis instar agere putent, nec hactenus cognita fuerit natura influentiarum; quam si D E V s permiserit, aperiemus in Astrologia gallica.


Quintò. pag. 92. assero quod si in eadem figura, Ex Tellure C. videatur Mars D & Saturnus F, distantes Cœli quadrante EL, &c.

*Que omnia nihil quàm chimeras esse & frivolum Morini commentum, ait Lansbergius.*

Quid facerem circa hæc Lansbergij signa adeo manifestata & diu & iracundiæ? Certè illius misereri cogor; quòd sine rationis filomæ figuræ labyrinthum ingressus sit, vel sicut musca acrius pungens in illam aranæ telam imprudenter impegerit, seque inde extricare inani conatu contendens se magis ac magis implicet.



Sed audiamus rationem quam attulit. Nam si ex hypothese Terra quiescentis (ait) Saturnus in F, Mars in D collocetur; Saturnus F non efficaciter tantum influet in Terra centrum per radium LA, sed etiam in punctum superficiei Terra C per radium LC, quia totus Telluris globus (quem hic supponit esse globum CNI) ad Cælum octauum ELGE instar puncti est.



Atqui si Cælum & Terra domorum circulis diuidantur more Astrologico, & GE ponatur esse Horizon, LA autem circulus Meridionalis, certum est quod nascenti in Terræ puncto N, punctum C erit in septima cuspide: ac proinde cum hîc tantum sit quæstio de influentia actione per situm corporeum, si Saturnus F ageret per situm corporeum in eam Terræ partem quæ versatur in septima domo, Saturnus ipse situ corporeo esset in septima domo, siue in radio CE; per quem Saturnus cum parte Cœli E simul incumberent illi Terræ parti C quæ septima domus appellatur, radiis ad Cœli centrum directis, vt ostensum est superius in examine responsionis ad primum argumentum astrologicum. Iam

verò certum est quod per radium LC Saturnus F situ corporeo non est in septima domo, sed in Medio Cœli. Ergo Saturnus F situ corporeo non agit per radium LC in Terræ INC, partem C: Erratque Lansbergius toto Cœli quadrante LE, vnde nil mirum si hæc astrologica vocet *chimeras & tenebras*, cum Astrologia ignarus hæc illi talia videantur, in quibus diutius immorari ipsum tædet (quod ait) proptereaue ad sequens argumentum astrologicum conuertitur.

Sextò. Igitur à pag. 131. ad 137 solutionis meæ ostendo contra Ph. Lansbergium pag. 102. progym. & cæteros Copernicanos, supra sphæram fixarum esse aliud Cœlum, quod voco primam causam physicam, diuisum in dodecatemoria realia & fixa, quibus insunt variæ operandi virtutes reales: proindeque falsam esse Copernici hypothesin, quæ Cœlum illud è medio tollit.

Respondet Iacobus Lansbergius suo more, *Argumentum illud nihil omnino ad rem facere. Nam si dodecatemoria realia & fixa ex Cœli effectibus demonstrantur, poterunt tam cum hypothesi Terræ mota conciliari, quam cum hypothesi Terræ quiescentis: Et licet hypothesis quæ Terram mouet nonno Cælo carere possit si necessarium non sit, illud tamen admittere potest si necessarium demonstraretur.*

Videte quæso an illud argumentum nihil ad rem faciat. Hactenus Copernicani mordicus defenderunt sphæram fixarum esse immobilem & supra hanc nihil prorsus esse: Iam verò Lansbergius mearum (vt vocat) ratiuncularum vi coactus non modò titubabat in illa opinione, sed admittit nonum Cœlum si necessarium demonstraretur. Eius autem necessitas demonstratur, non modò rationibus quæ Lansbergium ad hæc verba coëgerunt; sed inferiùs cap. 4. multò euidentius demonstrabitur. Cæterùm dato nono Cælo diuiso in dodecatemoria realia & fixa, inde necessariò sequitur motus sphæræ fixarum; hæc siquidem transferuntur de vno dodecatemorio ad alterum, vt de Ariete in Taurum: Ergo etiam motus sphæræ fixarum à Copernicanis, necessariò admittendus est contra eorum hypothesin. Idque certè fateri coactus est Ph. Lansbergius in suis Tabulis motuum præcepto 11: non quidem adductis rationibus meæ solutionis, quam vidit ante editionem suarum Tabularum (scilicet pudore retentus.) Sed adducta comparatione à cerebri motu desumpta, apud Mathematicos prorsus



ridicula & inefficaci ad palinodiam adeo insignem decantandam, sicque tandem concludit. *Verior itaque est Ptolemai & priscorum i philosophorum sententia, statuentium totam fixarum stellarum sphaeram lento quodam motu moueri in consequentia circa Zodiaci polos; & sic sex sim mutari stellarum fixarum longitudines: Cui sententiae nos quoque vi veriori subscribimus: quam tamen Patris confessionem omnino dissimulauit Iacobus Lansbergius. Quod verò hîc ait nonum illud Cælum conciliari posse cum hypothese Terræ motæ. Dico hoc tantum fieri posse per superadditas tres nouas hypotheses; quarum prima erit, sphaeram fixarum circumuolui in annis 25655 iuxta Phil. Lansbergium in suis Tabulis. Secunda. Nonum illud Cælum esse immobile. Tertia. Inter vtrumque Cælum dari spatium & substantiam ætheream. Nam si illi duo Cœli solidi fuerint contigui, nonum ab octauo raptim circūferetur, sicq; huic illud frustra superponetur. At patet tertiam hypothesin tantum fore confictam in gratiam causæ copernicanæ, sine vlllo naturali fundamento: Ergo falsa est immobilitas illius supremi Cœli, etiam ex ipso Ph. Lansbergio, supraposito præcepto 11 his verbis. *Consentaneum est supremam Macrocosmi sphaeram non esse immobilem. Quod autem Ph. ipse Lansbergius supremam sphaeram putat esse sphaeram fixarum, nihilque dari supra; se miserè implicat: Nam ibidem negat sectiones Eclipticæ & Æquatoris moueri in antecedentia, sed è contra fixas moueri in consequentia dodecatemiorum: At vbinam erunt dodecatemoria si nihil sit supra sphaeram fixarum? Videte ergo quid operatæ sint meæ parui momenti ratiunculæ vt vocat Iac. Lansbergius. Sed de his Astrologicis hætenus satis cum viris doctis, nimium verò cum ignaris; qui Astrologiam Gallicam à me promissam & rem sibi penitus incognitam scriptis suis ausi sint deridere. Veniamus ergo ad argumenta mea physica, an saltem in his refellendis scèlitiùs Lansbergio successerit.**

Itaque septimò. Cùm Kepplerus lib. 4. Astron. Copern. pag. 498. dixisset suam & Copernici hypothesin de loco Terræ in Ecliptica, non impedire Solem esse maiorem mole corporis quàm sint fixæ. Demonstraui pag. 69. meæ solutionis illud esse falsum, & fixam sextæ tantum magnitudinis maiorem esse corpore Solis 7301384 vicibus, etiam ex Keppleri hypothesibus, contra quem idcirco habeo intentum; nullum siquidem in mea demonstratio-

ne vitium annotare potuisti Iacobe Lansbergi; Quid ergo pag. 101. tuæ Apol. me circa hanc Keppleri refutationem aggredieris, & semper falsarius mihi tribuis Fromondi argumentum, cum pag. 74. ingenuè fatear è contra, stupendam illam fixarum magnitudinem non necessariò inferre absurditatem hypotheseos Copernicanæ?

Octauo. pag. 79. meæ solutionis argumentor contra Kepplerum à causa motus Terræ extra Mundi centrum. Ipse enim Kepplerus respuens cum cæteris Copernicanis Intelligentias & DEVM pro causis motricibus naturalibus (quod etiam faciunt ambo Lansbergij) excogitauit vt erat ingeniosissimus causas naturales, quæ Tellurem motu diurno & annuo circumferrent. Has ergo causas adeo validis rationibus euerto tum pag. illa 79. 80. tum à pag. 43. ad 50; vt Iacobus Lansbergius ne minimam quidem illarum ausus fuerit aggredi: imò earum vi fuerit coactus fateri Apol. pag. 27. *Se ignorare à qua causa Tellus moueatur*: Habeo igitur intentum contra Kepplerum & Te, quem pro defensione causarum Telluris motricum naturalium, piscis instar mutum effeci. Quod verò ais pag. 113. *Consequentiam non valere. Causa à Kepplero excogitata insufficiens est, Ergo nulla alia esse potest.* Non est hæc mea conclusio Lansbergi, sed tua qui semper falsificas: Mei enim discursus conclusio est, Tellurem non moueri à causis naturalibus à Kepplero inuentis. Quod si Copernicani alias causas habeant, has in lucem proferant, & à me æque facilè euertentur; si nullas, saltem fateantur Tellurem sola eorum opinione falsa moueri: Quod enim ais nullam causam excogitari posse quæ totum Cælum, Solem, Lunam & omnes stellas circumducatur, quæ simul ad mouendam Terram non sit sufficiens: Vera dicis; sed Tychonici cum Aristotele censent illa moueri ab Intelligentijs vel à DEO, quod verissimum esse assero. Nam certum est corpora illa non sui, sed alterius gratiâ moueri, quippe Terræ; ideoque non mouentur à principio intrinseco, sed ab extrinseco: At nec tu nec Copernicani cæteri (tuo Patre supra excepto) audetis asserere Tellurem moueri à DEO vel Intelligentijs; metuitis enim ne vobis dicatur primi Cæli motum non esse DEO vel Intelligentijs impossibilem, quem asseritis impossibilem; ideoque dicere mauis, Te ignorare à qua causa Tellus moueatur.



Nonò. pag. 49. Argumentor ab influentiarum cœlestium efficacissimo concursu in Mundi centro; Et assero quod si Sol ponatur in centro, sequentur duo; Primum: quod in Sole fient plures specie & numero generationes, quàm in Terra; vel Sol erit frustra in vtero Mundi: Secundum: quod ex parte situs globorum, &c.

Respondes, *Quod certior ratio cur in Terrâ non autem in Sole & planetis res variae producantur, est quod materia ad generationem apta in alijs globis desit.* Sed primò respondes quod ignoras, nec probare potes, arbitrantur enim plerique Copernicani omnes globos esse habitatos. Deinde quod tua ratio falsa sit in speculis concavis, quæ in comparationem assumpsi (quoniam cum Cœlo in modo agendi conueniunt) sic patet; Nam idem combustibile positum in foco speculi & extra; accenditur in foco & non extra; cuius vnica causa est diuersa virtus Loci, & non (quod ais) diuersa materiæ dispositio. Fateris autem quod si materia Solis sit generationi apta, plures in Sole quàm in Terra fient generationes, quòd nempe Sol occupet Mundi centrum vbi Cœli influentiæ ad producenda varia sunt efficacissimæ: Ergo fatearis oportet quod si Sol careat materiâ generationi aptâ; ipse frustra sit in Mundi centro. Vt quid enim Terram occupat dicebat CHRISTVS in Euangelio de ficulnea sterili? Et quo fine erit ille concursus radiorum influentiarum, ad generationem vt ipse fateris efficacissimus? Fateberis te id ignorare, vt de Telluris motrice. Tutissimum autem arbitraris solitum tuum effugium ad Eclipticam Mundi centrum apparens, in eo que tibi maximè complaces dum ais. *Quia cum Ecliptica apparens Mundi centrum sit, ratio dari nequit cur medius Eclipticæ locus ad producenda varia magis idoneus sit, quàm ille qui in Ecliptica circumferentia est.* Ipsa enim hypothesis Terra quiescentis qua Totum elementarem globum præsupponit Mundi centrum esse, ostendit non in medio, sed in ambitu apparentis centri atque in extrema eius parte res varias produci; hoc est in Aëre, Mari, Terra superficie, non autem in locis Terra centro vicinis.

Cæterùm apparens tuum Mundi centrum iam fuit superiùs explosum. Præterea vide quàm malè quadret futilis tua comparatio. Saltem tota Tellus (nostrum centrum apparens) fœcunda est in toto suo ambitu: sique in centro nihil generetur, id non contingit quidem defectu virtutum Cœli influentialium quæ totam Tellurem penetrant, sed aliarum virtutum eiusdem Cœli. &c.

planetarum; tum Ætheris & elementorum quæ vsque ad Terræ centrum non pertingunt: At Eclipticæ sphaera (vestrum centrum apparens) tota sterilis est & in profunditate & in ambitu excepto Solo ambitus puncto in quo Tellus reperitur: Imò Sol occupans locum concursus efficacissimi omnium virtutum cœlestium, & ætherearum, iisque toto suo ambitu expositus, omni tamen vt ipse fateris generatione caret. Ex quibus patet quàm absurdum & miserum sit Lansbergij effugium.

Decimò. pag. 107. 108. 109. argumentor contra Copernicum. Quod si Tellus moueretur in Ecliptica, nullus in Natura daretur motus simplex siue rectus siue circularis: Terrâ autem diurno motu circumducta ex Origani & Longemontani opinione, nullus saltem daretur motus rectus: Ad rationes autem Copernici dicentis non dari motus simplices, sed mixtos ex illis; & rectum cum circulari manere vt ægrum cum animali, aut lineam cum superficie. Respondeo dari ergo posterius sine priore, & compositum reale ex ijs quæ non dantur à parte rei, quod ex eius etiam comparationibus absurdum sic ostendo, vt eum defendere non ausus fuerit Lansbergius: ac per consequens habeo intentum contra Copernicum & alios. Ipse verò Lansbergius alia vititur comparatione pag. 114. Nimirum *quod omnia corpora mixta constant ex 4 elementis, quæ simplicia & impermixta nusquam ostendi possunt; proindeque friuolum est meum argumentum.* Vt verò è contra tuum Lansbergij argumentum aduersus meum pateat omnino friuolum. Fuistine in infima Aquæ vel Terræ regione aut in suprema Aëris vel Ignis, vt adeo audacter nobis asseueres simplicia elementa nusquam ostendi posse? Et si ostendi nequeunt impermixta in superficie Terræ, vbi viget mixtio elementorum ad mixtionem ibidem concurrentium; sequiturne illa nullibi esse impermixta? Sed adeo bonus es Logicus, vt particularem negatiuam in vniuersalem negatiuam conuerti posse putes: Tibique tantum negare & affirmare sufficiat sine vlla ratione.

Vndecimò. pag. 109. Argumentor contra Copernicanos ab Aëris perpetuo motu in occasum sub Æquatore. Videatur argumentum valde notandum. Contra quod hæc sola verba habet Lansbergius pag. 114. *Quod argumentum non attingam; quia Tract. 2. cap. 2. & 3. probatum fuit Aquam, Aërem & Terram eandem motus velocitatem*



*tatem suscipere posse.* Sed quid tibi prodest fallere Lansbergi? Nec tu nec alius vnquam probabit; dato Telluris motu Elementa Aquæ & Aëris ex æquo obsequi motui Terræ; id enim eorum naturis repugnat, vt etiam assumitur à Kepplero & Galilæo. Insuper verò nec tu nec vllus Copernicanus meum argumentum euerteret, & idcirco illud nequidem ausus es attingere.

Duodecimò tandem. à pag. 114 ad pag. 130, Argumentor contra Copernicum & Kepplerum à motu grauium per se primò Mundi centrum petentium; adeoque validis rationibus eorum opiniones expugno (quod nempe grauia sursum aut proiecta, aut producta ad Terram descendant, vel vt vniantur suo toti ex mente Copernici; vel quòd vi magnetica à Tellure trahantur ex mente Keppleri) vt Lansbergius neutram opinionem tueri voluerit. Et quia demonstro locum quem grauia appetunt, non esse per se centrum Terræ, Aquæ vel Aëris, sed tantum per accidens: esse autem per se centrum solius Cœli: Concludo grauia non ad Terræ, Aquæ vel Aëris centrum per se ferri, sed solius Cœli.

Respondet Lansbergius pag. 115. *Consequentiam huius argumenti nullam esse: quod tamen falsum esse quis Logicus non videt? Subiungitque rationem hanc, quia (inquit) grauia ex Natura sua tantum tendunt ad medium illorum quæ leuitatem & grauitatem habent, atque id Morini demonstratio euincit.* Sed non possum non mirari tuam impudentiam falsitati connexam, ô Lansbergi. Demonstro grauia tendere ad medium Terræ, Aquæ vel Aëris; non quatenus est horum medium, sed quatenus Cœli medium siue Centrum. Et tu planè contrariam demonstrationem mihi imponis: Cur id facis nisi quia alioquin impossibile tibi esset quidpiam respondere, & visignaris illudere?

Subiungis autem. *Quod si Morinus similiter probare possit annihilata Terra, Aqua & Aëre, hoc est grauib. & lenib., grauia idem spatij medium ex sua natura occupatura esse; confecta res erit.* Hoc igitur sic probo. Grauia non feruntur ad ipsum medium, quòd trahantur vel à Terra, vel ab Aquâ, vel ab Aëre, vel ab ipso medio siue centro; nec quòd quærant vniri suo toti sibi in Natura simili. Hæc enim omnia fuerunt mea demonstratione sic explosa, vt neutrum illorum defendere ausus sis, vel (vt res clariùs proponatur) lapis ad Globi terrestris centrum descendens, non habet à Terra vel

Aëre quod ibi descendat. Nam si daretur puteus Aquâ plenus ad Terræ centrum vel vltra pertingens, lapis ad centrum descenderet: sed neque id etiam habet ab Aqua; nam si puteus esset solo Aëre plenus, lapis tamen ad centrum descenderet: Ergo quod ad centrum descendat, id non habet à Terra, Aëre, vel Aqua: Imò hæc singula lapidi descendenti resistunt; maximè Terra, minùs Aqua; minimè Aër. Ergo non tantum perinde est Terram, Aquam & Aërem, hoc est grauiâ & leuiâ respectu lapidis descendantis esse & non esse; sed etiam lapidi ad centrum tendenti satius esset illa non esse, cùm eius appetitui vel inclinationi resistent, & eorum locum saltem à solo Æthere occupari, qui longè minùs resisteret. Si alia mea argumenta soluere non potueris, non video quomodo hoc soluere possis, sed video te coactum fateri, rem confectam esse.

Pro leuibus hoc tibi sit argumentum. Aqua in vaporem resoluta, ascendit suapte naturâ ob acquisitam raritatem & leuitatem, nec fugatur à calore resolvente, quia fertur ad Solem resoluentem; nec etiam fugatur à Terrâ vel Aquâ: nec attrahitur à radiis solaribus, id enim de fumo camini vel ollæ asserere ridiculum esset præsertim noctu; nec magneticè attrahitur ab Aëre, cuius media regio vaporibus est inimica. Habet igitur regionem sibi propriam ad quam sua naturâ tendat, quæ per consequens debet esse vel ad superficiem vel ad centrum Mundi. Non enim potest esse vtrumque; nam si vapores per se feruntur ad superficiem, per se non ferentur ad centrum, hi siquidem motus sunt oppositi: Esset autem vtrumque, si Terra esset extra Mundi centrum; nam à tota Terræ peripheriâ vapores diu & noctu exeunt: Atque hoc etiam argumentum potest grauib. adaptari, qui etiam per se à duobus terminis contrarijs, peripheriâ & centro Mundi ad Tellurem descenderent.

Concludamus hoc argumento. Ponatur lapis vel aliud graue procul à Terra in quouis puncto corporis illius sphaerici, cuius circulus maximus est Ecliptica, vel in huius centro. Quæro an sit descensurus in Terram? Fatebuntur omnes Copernicani cum Lansbergio supra, præsertim quòd illud corpus sphaericum quem ambit Ecliptica sit tantum apparès Mundi centrum. At ego dico, si Terra sit in Eclipticæ gradu primo Arietis, descendet lapis ad:



primum gradum Arietis: si Terra fuerit in secundo gradu, descendet lapis ad secundum gradum: si in tertio ad tertium & sic deinceps. Ergo graue in illo puncto siue loco, etsi fatente quoque Lansbergio habeat ex sua natura principium motus & terminum determinatum à quo sui motus, nempe illud punctum in quo esse ponitur; nullum tamen habet terminum determinatum ad quem: sed indiget determinari à globo Terrestris: hoc autem aliter fieri nequit quàm per tractionem magneticam Terræ, vel quod graue quærat vniri suo toti: Quæ ambo adeo validè refutata sunt à nobis, vt nec Lansbergius potuerit, nec alter Copernicanus possit vtrumuis defendere. Non ergo Tellus mouetur in Ecliptica. Confirmatur. Quia sublato Telluris globo & ambiente Aëre: vel lapis mouebitur à loco in quo ponitur vel non: Si hoc, ergo à Tellure prius trahebatur, vel ad eam mouebatur vt suo toti vniretur; cur enim ad illam moueretur & ea sublata quiesceret? Et si naturaliter siue ex se quiescit in Eclipticæ centro, cur tota tellus in illo ex sua natura nequit quiescere? At si à Mundi centro mouetur sublato Telluris globo, Dic mihi Lansbergi ad quodnam Eclipticæ punctum mouebitur? Hæc autem demonstratio longè excellit tuæ tuique Patris absurdæ demonstrationi motus Telluris in Ecliptica, pro cuius falsitate agnoscenda, Te ad Logicam in decennium remitto, vel ad iudicium semestris Logicæ tyronis.

Hæc sunt igitur Iacobe Lansbergi, quæ Tibi respondemus pro defensione nostrarum (vt ais) ratiuncularum Theologicarum, Astrologicarum, & Physicarum; quas non quidem rationibus expugnasti, sed contemptu, conuitijs & falsitatibus opprimere frustra conatus es.

## CAPVT IV.

*In quo quid pro Telluris motu defendendo supersit Lansbergio, disquiritur atque discutitur.*

**R**EFUTATIS omnibus quæ aduersum me dicta sunt à Iac. Lansbergio, iam mihi iure liceret cum Tellure quiescere: Verùm ne quid intactum relinquatur, quod credula nimis inge-

niaremoretur; placet adhuc vnicum illud argumentum explodere, quod Lansbergio superesse video, ad Solis ignaris illudendum: vt pote petitur à duabus experiētiis intra nauiſ foros, quas paſſim inculcat, ſed præſertim *cap. 2. tract. 2.* quaſi cauſa lucrum inde certò reportaturus.

Prima eſt, *pag. 18. Si quis pari impulſu ſagittam intra nauiſ foros primum emittat orientem verſus, dein in Occidentem, vel aduerſo vel comitante nauiſ motu, ſemper eandem vel circiter diſtantiā attinget, plus nec minus quàm ſi nauiſ quieſceret.* Vnde concludit Aërem nauiſ contentum, & per ipſum proiecta, moueri motu nauiſ; quam peculiare ſyſtema eſſe dicit: ideoque à ſimili in Aëre externo proiecta, circumferri motu Aëriſ ipſiuſ.

Sed quàm grauiter circa hoc erres cum tuo Patre (Lansbergi) nunc perpende. Si ſtareſ in prora nauiſ velociter motæ, puppim reſpiciens quæ fertur ad locum ſiue ſpatium mundanum quod occupas: Non tamen idcirco puppi appropinquareſ, niſi mouereriſ ad ipſam, & Tabulati ſpatium trajiceret, proræ & puppi interiectum: quia dum puppiſ fertur ad ſpatium quod occupas, æquè velociter fugiſ ab ipſa ad aliud, per motum nauiſ cui ſuperſtaſ; & quo motu raperiſ ſiue ipſe per te quieſcaſ, ſiue moueariſ. Atque idcirco vt puppim accedaſ, eodem modo ad ipſam te moueri neceſſe eſt, ac ſi nauiſ quieſceret.

Eadem eſt ratio de piſcibuſ in cymba aquæ plena, quibuſ à puppi ad proram nonobſtante motu cymbæ, trajicienda eſt aqua intermedia virtute propria, vt ſi cymba vel aqua quieſceret. Cum enim aqua vel quoduiſ aliud medium quieſcens reſiſtat mobili, indeque motuſ cogatur eſſe ſucceſſiuuſ: ſi contingat medium ipſum moueri, non ea propter ſuam deponet reſiſtentiam; ſed in ſuper mobile impellet atque transferet accidentaliter de loco ad locum ſiue ſpatium mundanum; niſi mobilis & mediæ eadem ſit ſeoriſ velocitaſ motuſ contrarij, vel mobile velociuſ moueatur quàm ipſum medium: Eademque eſt omnino ratio de ſagitta traiecta per Aërem nauiſ incluſum, & cum ea motum: de muſca volante per Aërem in magna phiala contentum, & de cæteriſ ſimilibuſ.

Hiſ verò conceſſiſ, negatur Lanſbergij conſequentia; grauiā in Aëre externo ſeu libero mota, ſimiliter transferri cum Aëre ipſo.



Prius enim demonstrandum est Elementum Aëris cum Tellure circumferri: quod nec fecit Ph. Lansbergius, nec faciet vnquam Iacobus eius filius.

Secunda igitur experientia hæc est. *Si quis naui mota, pondus ex Tabulato demittat; cadet ad perpendicularum, non aliter quàm si naus immota iaceret. Eodem tamen momento quo pondus descendit, naus ad satis longam distantiam mouetur. Ergo cerum hinc fit pondus ex alto descendens communi naus motu vnâ abduci: quod erat probandum.*

Sed attēde Lansbergi. Si ventus (quem Aërem motum vel Aëris fluctum appellant) domorum tecta trabesque interdum longè exportat, semper autem longiùs leuiora & sphæricam formam minùs participantia. Quid mirum si Aër naue inclusus & velociter motus, graue aliquod à suo ad Terræ centrum perpendicularo nonnihil violenter deturbet? Id præstaret multò efficacius aqua loco Aëris naue vecta; cùm enim graue decidens, ex se rectâ perat Terræ centrum; si cadendo contingat ipsum intercipi aliquo medio pertranseundo, quod circa Terræ centrum moueatur; ab hoc indubiè transferetur quandiu in ipso versabitur, validiùs quidem ab Aqua densiore, debiliùs verò ab Aëre rariore pari motu delatis. Quod verò interim graue sui ad centrum perpendiculari non obliuiscatur, sed pro illo militet aduersus externum Aquæ vel Aëris impulsus; patet ab exportatis à furente vento, quem ocysimè fugientem exportata non ex æquo sequuntur, sed breuè in Terram decidunt; non secus ac lapis in fluuium proiectus, Aquæ motui non obsequitur ex æquo, sed renititur donec in Aquæ fundum deuenierit. Et quò maior est corporis grauitas, eò minùs obsequitur: Et quia tam Aër quàm Aqua sunt corpora fluida solidis cedentia, graue autem decidens per ipsa, toto nisu contendit ad Terræ centrum; Vt verum est graue ipsum impelli à medio moto pro huius densitatis & velocitatis ratione: ita falsum est intra hoc cadere illud exactè ad perpendicularum, vt manifestè patet in lapide per aquam currentem decidente, cuius eadem est ratio quæ Aëris intra naus foras delati. Et quamuis illud tibi concederetur quid tum? Ideone graua per Elementum Aëris cadentia ab ipso Aëre circumferuntur? Certè semper tibi probandum prius remanet, ipsum Aërem circumuolui: Vide igitur quid pro tua causa valeant istæ experientiæ.

Eadem dici possent de Terrella Gilberti seu magnete; necnon de tua Terra chymica in ouo philosophico hermetice clausa: quas ab ortu in occasum rotare falsò dictum & à plerisque creditum est. Vt proinde non parùm sim anxius quò tandem se recepturi sint Copernicani ad rationes causæ suæ fulciendæ inquirendas; quandoquidem à Cœlo, Aëris Elemento, Mari & Terra expulsi, iam scrutantur nauium foros & Alchymistarum furnos. Verendum certè ne tandem hypocondriacis deterius habere iudicentur; quòd non modò contra omnem rationem atque sensum, se per ætheræa spatia diurno & annuo motu circumduci mira cum voluptate imaginentur: sed reliquis etiam hominibus similem imaginationem conentur imprimere.

## CAPVT V.

*In quo celeberrimi viri Christiani Longomontani, in Academia Hauniensi Regis Daniæ Mathematicum Professoris, censura meæ Solutionis exponitur, dubitationes aliquot proponuntur, & ijsdem à me respondetur.*

**D**E rebus astronomicis & astrologicis septies ad me scripsit Clarissimus mihiq; charissimus D. Longomontanus, qui Astronomiæ restituendæ diuturnam cum Tycho Brahe nauauit operam, nec breues epistolas sed valde amplas. Ille verò cum in sua Astronomia Danica, Telluris motum in Mundi centro simul cum Origano affirmasset, horumque opinionem in Solutione mea refellissem: tantùm abest vt exemplo Lansbergij bile succensus conuictorum flammæ in me vomuerit, quin è contrà vir ille celeberrimus annorum 70, Famosi problematis meæ solutione recepta, pro insigni suo candore ac ingenuitate, sequentem epistolam ad me scripserit; quantum veritati deferret testatus egregiè. Quod certè in eius laudem omnibus innotescere volui, ipsius epistolâ hîc apposita.



Viro Clarissimo & Excellentissimo, D. Joanni Baptista Morino,  
 Doctōri Medicinæ, & Professori Mathematicum in Regia  
 cathedra Parisiensi ordinario, Domino, amico  
 suo exoptatissimo S. P. D.

**D**esiderium meum (Amantissime D. Morine) serò licet, sed serò de  
 Quiete Telluris abs te probata impleuisti. Nam postquam librum  
 Domini Liberti Fromondi de eodem argumento, elapso mense Iunio nactus  
 essem, Tibique in præmissas tuas litteras respondi, Ecce tuæ sub finem  
 mensis sequentis pariter à Generoso D. Petro Wibe, una cum epistola tua  
 16 Ianuarij exarata traditur. Quamquam verò super hac morâ mirari po-  
 tuerim, tamen temporis spatium à longitudine disitorum inter nos locorum  
 mensurando, & simul mittendi occasionem ad solius prænominati Regij  
 nostri Commissarij opportunitatem suspendendo, stomachari desino: Præ-  
 sertim quòd tuam Famosi Problematis resolutionem de Telluris motu vel  
 quiete, Orbi non frustra exhibitam esse cognouerim. Etenim librum illum  
 tuum simul atque ad me peruenit talem deprehendi, ut statim Fromondum  
 è manibus deposuerim, tuumque peregrinationis meæ per Scaniam hisce  
 diebus canicularibus, quibus hîc à studijs publicis feriamur, comitem fece-  
 rim. Interea autem integram exolui, & ea quæ hætenus per occupationes  
 meas obiter notavi sincero animo nunc refero. Primò autem etsi Te, ut Fro-  
 mondum sacris monumentis de quiescente Tellure, pariter & geometricis  
 demonstrationibus circa cælestium Reuolutiones, pertinaciter inharere po-  
 tuisse viderim: Tamen ingenuitatem tuam laudo, quòd hisce nonnihil diffi-  
 sus, solas rationes physicas à Natura Telluris ad motum minùs ut ostendis  
 comparata sumpseris. Vbi certè experientia tua è fodinis Hungaricis re-  
 cum in Galliam deportata, facile totam Keplerianam machinationem de vi  
 magnetica Terra imò toti Cælo perperam ab eo tributa dirimit. Illum ut &  
 nouum istum Philippum Lansbergium Astronomum egregiè quidem meo  
 iudicio expugnans, nundum Copernicum ipsum plene viciisti. Valde enim  
 verisimile est Corpora illa maiora mundana liberè in suis locis ab optimo  
 Creatore illis destinatis pendentia, ita ab omogeneis suis partibus undique  
 comprimi ac sustentari, ut hæc ab illis si forte diuulsa, non aliò aufugiant,  
 aut in centrum Cæli ac Mundi decidant, sed mox rectè eadem repetant, velut  
 vberius de hisce 2. prognosticate Astron. Dan. præfixo differui. Am-  
 plius quod me attinet, non possum quin summis laudibus laborem tuum hunc

ut ceteras omnes extollam, quo & sacrarum litterarum & imprimis Domini Tychonis nostri assertorem præ omnibus hætenus eximiam Te præbueris: saltim modò etiam mihi scrupulum eximas. Qua scilicet ratione in Natura contingere possit, stellas fixas in liquido Cælo herentes ita uniformiter hætenus moueri, ut ne minima quidem differentia in distantijs ipsarum ab inuicem à prisco tempore Hipparchi imò Mundi conditi hucusque sentiatur: licet credibile fuerit easdem disparem à Tellure seu centro Mundi distantiam obtinere. Hæc sola causa mihi fuerat, cur ob dubium hoc ante D. Origanum, videlicet cum in Huena nostra Domino Tychoni in astronomicis inseruirem, Telluri potius quàm Cælo stellato motum istum tribuerim, ut in Astron. Dan. pag. 19. & 87. reperies. Etenim cum D. Tychonem super hac re consulerem, memini ipsum respondere; minimè id ad dubium fore; ob Rachiam seu expansum illud in quo sydera locata sunt. Genesis I. v. 14. & sequentibus; quod quidem licet rei spiritali simile sit, vim tamen validissimam habet corpora illa Mundi penetrandi, obsidendi & fixa illa sydera (ut rotantur) singula in destinatis suis locis sistendi ut quoque 2. prognostic. Astron. Dan. ostendi: quod si legas ac diligenter ponderabis, non dubite quin nonnulla Astrologie tue apprimè inseruitura inibi reperies. Hoc autem cum veteribus qui Cælum istud firmamentum nuncuparunt concessio, vel meliore ratione fortè à Te producenda, quâ hoc dubium meum (quod Te nundum attigisse percepi) tollatur; Equidem mente mea ab omni motu Telluris impostero quiescam, siquidem cetera abs Te efficaciter satis aduersus Kepplerum & Copernicanos sunt demonstrata ut superius dixi. Vnum autem hic obiter addo; scilicet non opus videri, extra spheram fixarum aliam nempe octauam ut vocant astruere, &c.

Ex quibus patet quàm ingenuè imò lætè pristinam opinionem suam deferat D. Longomontanus meis rationibus victus, & quæ supersunt illi scrupula amicè exponat, eorumque resolutionem à me quærat: quod certè & pro ipsa veritate & pro mutua inter nos beneuolentia animo lubentissimo aggressus, iamdiu respondi ad ipsum virum celeberrimum, & in epistola à me missa hæc inter alia inuenientur; quæ etiam superius dictis contra Iacobum Lansbergium, lucis non parùm allatura sunt.

### *Mea ad Longomontanum Responso.*

Primùm ergo dicis. Corpora Mundi maiora in suis locis pendentia, ita ab omogeneis suis partibus comprimuntur & sustentantur, ut hoc ab illis si fortè



*forte diuulsa, non aliò aufugiant, aut in centrum Cæli decidant, sed mox rectè eòdem repetant.*

At responderetur ex solutione Famosi Problematis pag. 55. Constare dari in Natura graue & leue absolutè: sunt autem hæ duæ qualitates principia effectiua motus rectilinei, ad medium scilicet & à medio; non cuiusuis corporis, sed ipsius Cæli siue vniuersi ex pag. 116. Cùm enim grauitas sit per se principium motus naturalis, necesse est vt detur vnus terminus naturalis ad quem illius motus: si enim plures essent tales termini, nulla afferri posset ratio cur grauia potius vnum quàm alterum terminum peterent; nisi diceretur vel illa attrahi ab ipso termino, aut aliquo corpore in ipso termino existente: vel illa ferri ad vnionem cum suo toto: quæ rationes saltè à Telluris globo validissimè fuerunt à nobis explosæ, quod tantùm contra Copernicum eiusque asseclas intendebamus. Hinc verò deducitur planetas in Æthere neque esse graues neque leues; sed naturæ mediæ: quod facit ad vniuersi perfectionem, quæ in omnibus admittereprehenditur extrema & media. Nam si graues essent, sua grauitate versus Mundi centrum tenderent naturaliter; si leues versus superficiem: siquidem ascensum aut descensum prohibere nequit Ætheris substantia, cùm sit eiusdem naturæ, consistentiæque tenuissimæ; ac liberè patens supra & infra planetam. Præterea planeta grauis violenter in suum apogæum attolleretur, & leuis ad suum perigæum violenter descenderet: At cùm neque sit grauis neque leuis, ita nec eidem attolli aut deprimi violentum est. Motus autem circularis quo Cælum & planetæ circumferuntur, illis neque est naturalis neque violentus. Non hoc, quia si planetæ carentes grauitate & leuitate non resistunt ex se motui sursum & deorsum, quippe ad apogæum & perigæum: multò minùs resistent circulari: nullus autem est motus violentus sine resistentia mobilis. Non illud, quia Cælum aut planeta non habet à principio interno, quod moueatur in occasum potius quàm in ortum, aut contrà; ergo à principio externo quippe Intelligentia motricè, iuxta Aristotelem & maiorem Theologorum partem: Idque non proprii, sed alterius boni gratiâ, quippe Telluris & hominum. Vnde etiam fit manifestum contra Copernicum, motum circularem non esse corporibus cælestibus vel vlli corpori formaliter naturalem: Et in Astrologia Galli-

ca ostendemus, multò naturalius esse cuilibet corpori in proprio loco quiescere, quàm moueri; tantùmque moueri naturaliter, quando positum extra proprium locum, fertur ad ipsum motu rectilineo, insita sibi grauitate aut leuitate. Iam ergo si ex Lunæ globo pars aliqua auelleretur, nec ab Intelligentia moueretur; ipsa sic auulsa tantùm diurno motu seu communi circumferretur cum Æthere ambiente. Ratio est quia nec grauitate nec leuitate ferretur ad Lunæ corpus, his enim caret qualitatibus; nec Luna est terminus ad quem grauiū. Quod si dicatur Lunæ partes in regione Lunæ neque grauitare neque leuitare, at supra ipsam regionem grauitare, infra leuitare; Idque tantum ipsius regionis respectu: Ergo idem dicendum erit de partibus Solis in regione Solis, & de partibus Saturni in regione Saturni, &c. At cur Venus grauitabit in regione Martis & leuitabit in regione Solis, si eadem sit Ætheris natura & consistencia in vtraque regione, vt negatur à nemine? Præterea certum est quod pars illa non trahetur à Lunæ centro, vt à nobis ostensum est de Telluris centro. Quod si tandem dicatur pars illa ferri ad Lunæ corpus tractione magnetica, vel obunionem cum toto (quæ in Tellure à nobis sunt explosa) quid fiet si Luna in duas partes æquales & à se distantes diuideretur? Nam si Tellus in duas æquales & distantes diuideretur, ambæ procul dubio in Mundi centro concurrerent, propria cuiusque grauitate, vt constat ex solutione problematis à pag. 116 ad 119; quæ grauitas nulla est in Lunæ partibus ob rationes supradictas.

*Secundo. Queris cur stelle fixæ in liquido Cælo hærentes vniuniformiter moueantur, seruata semper eadem inter se distantia?*

Sed Respondetur quod sublato Telluris motu, fixæ duplici motu feruntur, super diuersos polos; communi scilicet & proprio. Si igitur regio fixarum liquida esset (vt ais) etsi virtus illa Tychonica Rachis ijs continendis in eadem inter se distantia, motu communi nonobstante sufficeret: Egerent tamen singulæ fixæ peculiari Intelligentia pro motu proprio; cùm nullum corpus cœleste ab interno principio circumferatur vt supra dixi. Et inter Intelligentias maxima requireretur aduertentia, ad fixas in eadem inter se distantia conseruandas: quod etsi Deo non sit impossibile; breuius tamen est fixas ipsas in vnico orbe solido constituere, quem idcirco admittimus, & Galaxia euidenter probat, quæ



etiam ex Te materiâ deffert à reliqua regione fixarum, & perdurat inuariabilis: quod fieri vetaret primus motus rapidissimus, si sphæra illa liquida esset. Adde quod Galaxia liquida, etiam per Intelligentias non paucas, ingenti solertiâ fixarum motu esset circumferenda, ne in sui parte aliqua discontinuaretur, dilataretur, restringeretur, aut rarior densiorue efficeretur. Tandem Kepplerus ipse fateri coactus est, Mundum vniuersum<sup>1</sup> contineri aliquo corpore solido, non secus ac ouum (Mundi Imago præ cæteris genuina) cortice siue testâ propria continetur; & putauit illud corpus esse sphæram fixarum.

*Tertiò. Queris cur supra sphæram fixarum, aliam esse profitear, cum aliâ opus esse non videatur?*

Ad hoc verò me non cogit Astronomia, quæ fictis hypothesibus varijs, diuersimodè affert rationes motuum siue phænomenon eorumdem: sed cogunt Physica & Astrologia. Physica quidem, Nam sublato Telluris motu, certum est fixas singulis diebus reuolui super Æquatoris polos ab ortu in occasum. Et in annis ex Te 25940 super Eclipticæ polos ab occasu in ortum; fertur ergo sphæra fixarum duobus simul tempore motibus, & ad terminos oppositos. Igitur vnico per se & altero per accidens; nec enim vtroque per se possibile est: motus enim per se fit vel à principio interno (qui in circulari motu à nobis rejicitur) vel à causâ externa corpori mobili per se applicata; vtramuis autem causam simul tempore idem corpus mouere ad ortum & occasum, non est magis possibile, quàm idem corpus simul tempore mouere ad centrum & superficiem vniuersi. Cum autem motus per se, fiat à causâ per se corpori mobili applicata; Ergo realis motus per accidens, fiet à causâ non per se, sed per intermedium corpus applicata; ex cuius motu per se, alterius corporis motus per accidens consequatur. Id verò aliter concipi nequit, quàm super sphæra fixarum posito altero Cælo mobili ab ortu in occasum; cuius motus, per accidens communicetur ipsi sphære fixarum quatenus in illo contentæ. Datur ergo aliud Cælum super sphæra fixarum. Atque sic patet D. Paulum verè dixisse, raptum se fuisse vsque ad Tertium Cælum quippe empyreum: quod Domini nostri IESV CHRISTI eleuatione oculorum in Cælum quoties Patrem oraret, sed euidentiùs ex eius visibili ascensione, constitutum esse supra Cælos

naturales conuincitur. De altero autem Cœlo pro motu obliquitatis Eclipticæ, vehementer gauisus sum quod Kepplerus in *Tab. Rudolph.* illum respuat, & æquinoctiorum prosthaphæreses in suis ephemeridibus omittat: Nam longè antea mihi innotuerat, rationes Astrologicas ipsum non admittere: Imò Scheinerus libro de refractionibus cœlestibus, causam apparentis variationis obliquitatis Eclipticæ refert ad Solis refractiones, ante Tychonis tempus neglectas. Quod autem hæ rationes, minimè spernendæ sint ex eo constat; quia inter corpora cœlestia motusque cœlestes, nihil datur in Astrologia superfluum vt ipse nosti. Omnia enim corpora cœlestia eorumque motus, Astrologiæ deseruiunt. At motus obliquitatis Eclipticæ, nullius est vsus aut virtutis Astrologica, vt ostendemus in Astrologia gallica: Ergo non datur ille motus superfluus.

Ratio autem Astrologica quod supra sphæram fixarum sit primum mobile, habetur in fine Solutionis nostræ Famosi probl. L. ubet autem in Tui gratiam hoc addere. Dum sol versatur sub Aquario (exempli gratia) manat à cœlesti loco Solis in Terram, virtus mixta ex influentijs Solis & Saturni, nec ea de re dubitatur apud Astrologos: At Sol tantum ex se pollet virtute solari & non saturnina, cui potius contrariatur: Neque in Aquario exiit solarem, vt induat saturninam, cum influxus vtramque contineat. Quod autem Aquarius virtutem saturninam transfundat in Solem, vt hic quoque per illam agat, pater ex eo esse falsum; quoniam solus Aquarius in horoscopo, quouis absente planetâ mores saturninos realiter influit, per suum situm in illo loco; vt Mars in Horoscopo mores martiales; proindeque nullius planetæ præsentia indiget Aquarius, vt per illum agat: Agunt igitur Sol & Aquarius simul commixtis viribus & independenter ab inuicem; non secus ac si essent duo planetæ coniuncti. Cum autem influxus Aquarii sit realis; Ergo Aquarius erit quid reale. Dices Aquarium esse partem sphæræ fixarum. At quod non ita sit pater, quia vt Sol & reliqui planetæ; ita quoque fixæ & partes sphæræ fixarum mouentur sub dodecatemorijs, atque agunt cum ipsis vt dictum est de sole & Aquario. Quod si dixeris Aquarium esse tantummodo spatium aliquod mundanum, cui ea virtus competit; Rursus negatur. Nam neque est spatium fixum, quandoquidem



sublato Telluris motu, quodlibet dodecatemiorum mouetur  
 per totum Mundi spatium in 24 horis: Neque est spatium mobi-  
 le; nam motus non conuenit spatio, estque omne spatium munda-  
 num immobile. Quod si tandem dixeris Aquarium esse quandam  
 in Cœlo distantiam siue situm respectu punctorum æquinoctij, in  
 quo quidquid intrat siue sit planeta, siue pars sphæræ fixarum, sa-  
 turnaliter influit; sicut quidquid respectu Nati ingreditur situm  
 primæ domus agit in ipsum vitaliter: Hoc etiam refellitur; Tum  
 quia situs domuales sunt quædam Mundi spatia fixa in quouis  
 Horizonte, quæ non influunt in Natum, sed tantum determinant  
 planetas & Cœli partes spatia illa ingredientiæ, ad agendum hoc  
 vel illo modo, iuxta naturam situs: Non enim domus prima influit  
 mores vel circa hos; sed signa & planetæ in prima, horumque  
 domini: At dodecatemoria per se sola influunt, vt dictum est su-  
 pra. Ergo pro dodecatemoria assignandum est aliquod reale, quod  
 neque sit sphæra fixarum, nec mundanum spatium, nec distantia  
 ab æquinoctiorum punctis: Tum quia vt quæritur & datur ratio  
 non fictitia sed vera, ex nostra Cabala domorum in lucem edita,  
 cur prima domus sit vitæ, &c: sic quæretur ratio, cur distantia, spa-  
 tium vel pars sphæræ fixarum quæ vocatur Aries, sit naturæ igneæ  
 & martiæ, &c. Nec sufficiet pro causâ asserre motum planetarum  
 ab occasu in ortum, aut motum rapidissimum sub Æquatore: hæc  
 enim differre nō faciunt naturam Arietis à natura Libræ: nec tan-  
 dem proderit positio apogæi Solis, in principio Arietis initio  
 Mundi, eiusque motus ad borealem Cœli plagam: Nam hic etiam  
 motus est ab occasu in ortum, & successu temporis transiret apo-  
 gæum Solis in partem Mundi australem; nec idcirco mutarentur  
 naturæ dodecatemiorum: Ab alio igitur ipsa ratio petenda est;  
 quod esse primum mobile, seu causam primam physicam hæte-  
 nus non benè cognitam, naturâ suâ simplicissimam, sed initio  
 Mundi secundum partes ad diuersas naturas mirabiliter determi-  
 natam, ostendemus. De o dante in Astrologia gallica: vbi huius  
 primi Cœli necessitas Physica & Astrologica ex supradictis suffi-  
 cienter euidens, ex professio demonstrabitur.

Iam verò quod nullus sit Terræ motus (vt pluries supra assumi-  
 tur) constat ex solutione. Probl. Fam. pag. 129. & 130: vbi habetur  
 demonstratio, quam qui euerterit, dignus erit cui & non mihi

omnes acquiescāt. Et sic habes (Vir Clarissime) solutiones omnium obiectionum à Te propositarum vt proinde nulla Tibi deinceps dubitatio de Telluris quiete debeat superesse.

## CAPVT VI.

*In quo obiter agitur de libro siue dialogis Galilæi à Galilæo, nouissimè in lucem edito, pro Telluris motus fucata defensione: Deque sanctæ sedis apostolicæ sententia in ipsum librum & Galilæum lata: necnon eiusdem Galilæi publica abiuratione, doctrina illius erronea.*

**P**RIMUM exemplar mei libri aduersus Terræ motum missum fuit D. Galilæo, illo nequidem integrè impresso; id nempe efflagitantibus charissimo D. Gassendo & D. Deodato, vtrisque Galilæo necessitudine deuinctis: Vt quia vulgaribus spretis rationibus nouas pro Telluris quiete attuleram, Galilæus illis visis maturè sibi consuleret, ante sui libri publicam editionem, quod ego etiam peroptabam. Tardiùs verò quàm par esset ad illum peruenit mea solutio, indeque doluit vt testatus est litteris ad D. Gassendum postea scriptis mihiq; ostensis; quibus aiebat quod si ante sui libri editionem meum vidisset, honorificam in ipso fecisset mei mentionem. Mirabatur autem quod Telluris quietem rationibus astrologicis, ipsa Telluris quiete obscurioribus astruendam susciperem; at prudens nec damnans incognita sibi, quæ circa hæc pollicebar in Astrologia Gallica, se auidè expectare dicebat. De meis autem rationibus physicis planè tacuit in illa epistola; & potissimùm de mea demonstratione aduersus præcipuum eius fundamentum pro Telluris motu, petitum à causa fluxus & refluxus Oceani. Siquidem Manuscriptum illud cuius memini pag. 57. meæ Solutionis erat ipsius Galilæi, vt iam quoque patet ex eius dialogis. Idque mihi quidem asseueratum fuerat à viro clarissimo, qui scriptum illud ex Italia adduxerat ipsumque mihi communicauerat; sed Galilæi nomen consultò subticueram, quòd Manuscripto non esset appositum. Galilæi autem libro in lucem edito, ab eoque ad D. Gassendum huc misso, & mihi ostenso, Vidi



multa docta & subtilia Galilæi ingenium redolentia : sed ad Telluris quietem quod attinet, ipsa communibus primò Copernicanorum rationibus, tandemque præcipuè illa demonstratione fluxus & refluxus Oceani, vt toto Arietis nisu à Galilæo impetitur, quæ omnia in solutione nostra refutantur.

Duobus autem pro Telluris motu rationibus valde insistit, desumptis à motu grauium, quo maximè premuntur Copernicani. Prima est. quod grauia sursum proiecta vel genita deorsum moueantur, non quòd centrum affectent; sed vt suo toti, quippe Terræ vel Aquæ vniantur, quam etiam in solutione nostra validè refutauimus: sed in Galilæi gratiam hoc addo. Nonne vidit ipse apud Chymistas 4 liquores diuersæ concistentiæ in eodem vase contentos, & ab inuicem omnino separatos; & quomodo violenter commixti deindeque suæ naturæ vel inclinationi relictî, rursus ab inuicem omnino separantur, seruato eodem ordine loci, in quo prius erant ratione grauitatis? Eodem igitur modo si omnia elementa à D E O per minima miscerentur in elementorum vase siue loco, ipsa inclinationi suæ derelicta sese rursus ab inuicem separarent, & Terra vel eius atomi ob densiorem grauioremque naturam, fundum siue centrum regionis elementaris peterent; idque propriæ naturæ sponte & non vt suo toti vnirentur vt palam est. Vel si solum esset elementum Aquæ sine Terra; hæc vero deinde crearetur cum ea cavitatum forma quam iam habet; fieret ex Terra & Aqua idem globus qui iam cernitur & maria eodem modo disposita: quippe Terræ centrum sibi debitum occupante, Aquâ autem Telluri circumfusa.

Secunda ratio est. Quod grauia cadendo sequantur Telluris motum versus ortum, ideoque lapis è summitate Turris cadat perpendiculariter in punctum Terræ cui ante casum superstabat. Quod autem grauia spòte sequantur Telluris motum, probat Galilæus hac experientia, plusquàm vigesies repetita: Quod lapis ab aliquo homine demissus in nauem motam à summitate mali, cadat in pedem ipsius mali, proindeque perpendiculariter; quare cum durante casu lapidis, nauis promoueatur; necessariò infertur lapidem sequi nauis motum: sic ergo omnia grauia cadendo sequuntur Telluris motum. Quo etiam argumento vsus est Iacobus Lansbergius.

Ego verò qui rationibus contra ignotas mihi experientias à viris-

doctis productas militare non noui; volui hoc idem ipse experiri super Sequana & vidi verum esse, quod ait Galilæus tribus experientijs; primâ cum stupore, secundâ cum admiratione, & tertiâ cum risu: causam enim talis effectus illico affecutus sum, ignoram vel dissimulatam Galilæo Lansbergio & cæteris qui de hac experientia pro Telluris motu frustra gloriantur; Et hæc est. Quod motu hominis lapidem tenentis, ipse lapis antrorsum impetatur; & eò longius, quò velocior erit naus motus: vnde nil mirum si lapis antrorsum impulsus cadat in ipsius mali pedem. Quod autem res sic se habeat inde constat euidenter, quia si naus transiret sub aliquo ponte in cuius concameratione quispiam immotus teneret lapidem, dum alius in summitate mali cõstitutus alterum teneret; amboque homines ex ipsius mali summitate eodemq; momento lapides demitterent: prior lapis non caderet ad pedem mali, sed versus puppin; nimirum ad punctum cui prius perpendiculariter incumbebat: posterior autem caderet ad pedem mali. Non ergo alia de causâ quàm quia posterior lapis motu hominis à quo tenebatur antrorsum impulsus est. Semper igitur vanæ sunt atque erunt rationes Copernicanorum.

Porro quàm infaustis syderibus in lucem editus fuerit liber Galilæi, patet ex sententia aduersus ipsum Romæ lata; quâ nimirum re vt par est examini commissa, Doctrina de Telluris motu dicitur in fide erronea & scripturis contraria; liber dialogorum Galilæi prohibetur; Et Galilæus ipse ad publicam sui erroris abiurationem condemnatur. Quam sententiam & abiurationem Romæ factam hîc apposuissemus, nisi ipsius Galilæi viri de Mathematicis & Philosophis benemeriti famæ consulere, satius esse duxissemus; Nam & homines sumus. Quod si Hæreticis Galilæi condemnatio minùs arriserit, saltem fateantur oportet, physicas omnes rationes, euidentissima S. scripturæ testimonia, & sacrosanctæ Ecclesiæ catholicæ decisiones SPIRITV SANCTO Præsidente latas, & hîc & in cæteris, eorum erroribus planè contrariari; pro quibus defendendis ne quidem vllius momenti ratiunculam hactenus attulerūt. Cæterùm Lansbergio citius respondiissem, nisi Longitudinum Scientia à me inuenta, Parisijs publicè demonstrata: & iam in lucem edita, me altius occupasset.















64131

J39



